


OVEEHIWA MWAHA WA MASU

 Kooxukhuru, Munna Neville.

Miyo kaahimwiirela Munna Neville, “Mookupali wira khamurina mureeriho hata vakhani voosiis’ula?”

² Miyo kaahirwa waavekelela aretta. Yaahikhala atthu kamosa-kamosa yaathukumanne mwa ele hiyo...oxaaka Ttiminku voosiisu ene. Ale orin’aka waaphwanya iwe, kinniiriha wira erwe wa okereja. Nto miyo—miyo kweekwe kinnuupuwela wira ti yooreera waavekelela aretta mukereja. Miyo nkisuwenle. Okisivela ekereja, ni orwa va vaavo muthukumano, atthu ankhala’aya va evekelaka.

³ Nto aahikhala mwaaruusi ottuli iwe, mwaaruusi oomalela oreera, vano, kinoona wira owo okilante nipuro nlo va naanaano, vakhala wira atthu kharonwe owaani. Oh, kinnimoona vano. Nto owo mwaamukhaani oomalela oreera. Ni owo khoreere owereiwa. Vano hiyo naamuwiriya, okathi wiiwaly’ahu mutthaka wa ilavulelo ni otaphuleliwa wiiraneieye. Nto hiyo naamuwiriya, ni noona wira naaniwa saana wira yaahihimmwa etthu ya mwaaruusi mmosa. Vano naamuwehererya wira noone sinto Apwiya yaanivaha mutthaka, wa etthu y’ohimya mme. Masi kinoona wira mwaaruusi uwo ookhala saana vano, ni onoorowa okhala mukumi. Nto siiso. . .

⁴ Ni aahikhala muhano mmosa wamphwannye ohoona, nave-tho, ni hiyo nammuvekelela. Ni mulopwana mmosa mw’ampulansiyani ota iwe, murumeyi mmosa. Nkinikupali wira mulopwan’owo aanirulela ikhiilu muloko ni thanu na mosa, wala muloko ni thanu na tthaaru. Vekeekhai—vekeekhai tu, tu. . . Vano nto miyo khurwa waavekelela.

⁵ Nto mwaha kaakhalenly’aka oothanana, vanci-ene, esarihelo eroomora vaniinoni vaka. Nto kiniisoopela muturi, voosiis’ula, nipuro nenlo na niino naka vo, wiitho iwe. Nto vano awo anikileela wira kikumihe-mo, siheliwe-mo ittiyelo. Nto vano wuuluvala nno onkela, t’itthu emosa ensuwel’aka. Ni kaahikhalana esarihelo emosa mwa nenlo nimosa, ntoko nuusu, nto vapacenry’aka olavula, kaaniwerya woona, ntoko wira ephoyo yaanikhumela ota, mo—moosuwela enihimya’aka, okhuma eviraka muyanoni mwanu. Nto enniwiirihani otitirya, vakhani.

⁶ Hiyo vekeekhai n’atthu ooreeriwa okhala akumi voosiis’ula, ni owerya orwa okereja. Nto waattamela nno wa Natale, niwehereryaka niira ninkhalaniwa, nenlo, miyo—miyo kinroromel’aka wira. . .Khareere anamwane va voosiis’ula, tivo miyo kinoomaala. Munnona? Nto hiyo aalweene, imaara

sikina, ninnilavula itthu sihintthuneya hata anamwane wiiwa, moosuwela.

⁷ Masi, kinoona wira ekereja yookhalana yoovaha yaamukhaani y'axinamwane, nuvira okathi vakhani. Miyo kaamuweha paahi, ottuli iwe. Oh, nyuwo muntthunasa ohala. Numala exikola ya Ttiminku, mulipelelase vakhani, moone, okhala wira ki—kinoona wira aakhalana soovaha kamosa-kamosa ottuli iwe s'axinamwane, wira ekawelasiwe voosiis'ula. Nto okathi... Nyuwo axinamwane, muupuwele, niraka yeela, kintthuna kilakiherye ela, kahi Paapa Noweli, okhala wira eyo ehantisi nihiku nlo munrowaanyu osuwela wira kherina hat'etthu mwa yeeyo. Masi ti wa Yesu Kristu, Ekeekhai ya ikeekhai sothene, moone, Mwaana a Muluku. Nto hiyo ninoovahani yoovaha ela yaamukhaani, voosiis'ula, wira noosuweliheni wira emaara emosa Muluku oovaha yoovaha yuulupalexa yaakhanly'aya ovahiwaka nloko n'atthu: Mwan'Awe. Ni hiyo nirina enamuna yoohireera, yo wooniherya eyo. Ni khiivo etthu ekhanly'ahu ovahaka enlikana ni yeeyo. Masi ntoko atthu anookhwa paahi, mmosa ni mukhw'awe, ninniirelana siiso.

⁸ Vano, kaarowa olipelela mpakha Ettiminku enrwa. Ni alakela kinoolipelela, khula enamuna, wa etthu kaatthun'aka ohimya. Nto yookhala etthu emosa nisu—nisuwelihw'ahu, owaani wu, mwa yoowoona emosa, yeeyo orin'aka otthara. Nto eri ntoko... Eri ntoko, enooneya ntoko, yaamukhala etthu yoorika, masi hiyo khinnatthuneke wuupuwela wira etthu Muluku onihimya'awe ti yoorika. Miritti Sa—Sawe ti sooveya.

⁹ Nto okhalaka wira Ettiminku enrwa, Muluku atthuna vale, ninrowa okhalana o—okokhorela vaava okathi vakhani ohinatthi Owehererya wa Mwaakha Musya, Apwiya yasiveliwa vale wira nikhhalane okokhorela nno. Ni ninthuna nikhhalane okokhorela wa voosiisu, ovekeleliwa wa aretta, ni khino muteko w'opatiiso. Vano kihuupuwela, waalaleerya apatthan'ihu, wira ewerye orwa. Vano ninookhalana Ttiminku voosiisu ni Ttiminku ohiyu. Vano nto atthu antthuna ehale mwaha wa Mwaakha Musya, vano nihaana e... Ninrowa okhalana Owehererya, okathi ula? [Munna Neville oniira, "Ayo."—Mol.]

¹⁰ Anookhala arumeyi oohiyana-hiyana va, anrowa olavula ohiyu wa Mwaakha Musya, mpakha ohiyu eriyari. Ni—ni hiyo ninnaalattula arumeyi yaawo wira erwe elavule. Apwiya yathhuna vale, kintthuna kikhale mmosa a yaawo arina etthu y'olavula ohiyu wa Mwaakha Musya.

¹¹ Nto Ettiminku enttharelana, kaahuupuwela wira kaamuruuha ettharanelo sa itthu siniiraneya, siniiraneyaka, wooniherya moota Muluku onivar'awe muteko n'atthu Awe, ni oruuha eyo mpakha v'e—v'ethokani va ekereja.

¹² Nto anci-ene a nyuwo animwiikoha mwaha wa mwah'ola wa mpoosito wa soophwanya ninkhal'ahu niviraka-mo. Woomalihiwa. Vano nto kintthuna kooleleni moota yiiraneiy'aya, nave-tho. Ni kinoona wira, yaamukhala, okhala oohimya-tho, Ettiminku enrwa, tivo kinoolipelela Ettiminku enrwa. Nto kimpavela olavula vakhani, Masu, voosis'ula. Munnona? Nto Ettiminku enrwa, kino—kinoophavela o, Muluku athuna vale, woolelani moota sothene siiraneiy'aya, ni wooruuhelani khula emosa wa itthu Apwiya yaahimaly'aya, ni woona olikana waya oratteene, okhaliha voolikana oratteene. Munnona? Awo kханиhimya hat'etthu yoovonyeya.

¹³ Masi, vano, etthu emosa entthun'aka ohimya voosis'ula, alakela kihinrowaaka, ohimya Ettiminku enrwa, enihimya mwaha w'etthu yiiraneiy'e nsana. Kaari oohithuna vakhani orwa voosis'ula, okhala wira vekeekhai kiri ntoko oohaaxeya, wira nki—nkinoona ntoko otteeliwa saana. Masi okhalaka wira kiri va, ahe, kinoophavela wira vooreerexa sinwery'aka.

¹⁴ Nsuri ohiyu, kaahixekuriwa, Munna Sothmann mulopwana ni muthiyana, ntoko sinsuwel'ahu va, mmosa wa matiministratoore a mukereja, n'amwaar'awe, yaarimoorwasa waaxekurya amwaar'aka ni miyo. Nto hiyo naalavula mwaha wa mithukumano sinoorwa oPhoenix ni mapuro makina, wakhalaru otthuna w'Apwiya. Nto naari oohirupa mpakha ewoora ntoko muloko ni minuutu miloko miraru s'ohiyu, woona waka, nto kaaronwe orupa ntoko ewoora yanamuloko n'imos a y'ohiyu.

¹⁵ Nto emaara ekina ohiyu, kaahiloha etthu. Nto moolohani mu kaahimoona mutthu aakhala ntoko atithi aka; mulopwana mmosa, muulupale saana, aamoonihereya paahi, w'ohimiyaka erutthu, atithi aka. Kaahimoona muthiyana, ahaalikana ntoko ame aka; masi, mnakhala vo, aakhala ntoko ame aka. Nto mulopwan'ola (aalikana ntoko atithi aka, iy'awe muthiyana'ola) aanimuhooxa vootakhala-vo murima, mpakha vaarin'awe niwuni, vano aaninvara so n'ummana niwuni nenla, vano owo aanihileya ni omorela vathi. Vano nto—vano nto, nuvira okathi vakhani, owo aanitthikela-tho ovenya. Vano mulopwan'owo aanirukurerya, ni wupuwela ommana-tho, owo aanimmana-tho. Vano miyo kaarimweemela ottaiwene, kiwehaka.

¹⁶ Vookiserya, miyo kaahiphweeleya ni yeeyo. Nto miyo kaari ooyevaxa onvikana mulopwan'ola, ooneya ntoko atithi aka. Tivo miyo khimurowela khimuthoonya wiitho wawe. Miyo khwira, "Muhitthikele-tho ommana." Munnona? Nto vairaly'aka siiso, khupacerya wiiraneiy'a etthu. Miyoona saka khupacerya othukumela, vano kaahikhalana mitika, suulupale ni soolipa. Nkinatoko woona mitika sene seiyo. Vano miyo khunvara mulopwan'owo muxikoni, nto miyo khwira, "Muhitthikele-tho ommana. Mwammana vale, munrowa woonana ni miyo mwatthikela-ru ommana." Vano mulopwan'owo aahikoova, vano khimuhiya. Kivenya.

17 Ahe, kimpaahtale-ene vaavale, okathi vakhani paahi, tthiri, otaphuleliwa wa yeeyo waahirwa. Eyo yaari, vekeekhai, muthiyana, nilavulaka mwa nlikanyiho, ti Ekereja, eri ntoko mai. Atiithi ti muromolelo vasulu vaya, onruma vasulu v'Ekereja, ntoko iya onimuruma mwaara. Nto ti miromolelo iya sinihukhumu Ekerej'ele, ni hata khasinihiya Eyo ovenya khweemela siiso. Paahi, khula okathi Eyo emphavel'aya ovenya wala wira etthu, awo, atthu mme, muromolelo onoomoroxa Eyo. Nto eyo enihimya paahi ohela mi—mitika sa waamini vale wira kikhale vale ni ekath'aka kithoonyaka, ni kiiraka, “Munimoonana ni miyo. Munnona?” Okhala wira, aakhala atthu kamosa-kamosa mme akhanle a Muluku. Vano eyo yaari saana. Ntoko. . .

18 Naahikhala ntoko iwoora piili, wala tthaaru, wona waka. Vano mwan'aka mwamuthiyana, mmosa aya, Rebekah, ottuli iwe, onvara Oxipiritali Metotista oLouisville. Ti, oh, enamuna ele yoopacerya owiixuttiha manfurumeera. Ti “nanvara muteko vootthuna,” aniwiihana siiso, wala etthu ntoko yeeyo. Nto owo aari, owo. . . Awo yaahimwiihana wira arwe voosiis'ule, nto ti yeeyo yaakivenxale. Ni waari vahinaxe, nto owo, ni muxirikh'awe mwaamukhaani a oxikola nno, awo—awo anvarasa muteko weiwe vamosa, nto kaarowa waakuxa waarowana oLouisville. Awo yaahaana okhalasa weiwe ewoora ya namuloko. Vano amwaar'aka yaanitikinihiwa xeeni ahaawery'awe ovolowa okatthi. Miyo kaarowala.

19 Vano, sinnikikhumelelaka itthu sinci-ene mw'ekumi aka, masi nkinatoko okhalana etthu ntoko eyo. Miyo kaahikela mw'eyuukhwelo. Nkinsuwela etaphulelo aya. Nkaatonko okhalana etthu siiso kookhala—ru. Masi, ohoolo waka, yaakhala ntoko kaahisuwela wira yaari yoowoona, ni kaari mwa yoowoona. Masi kaalavula ni mwan'aka mwamulopwana, Joseph. Yoowo, ahaakhanle okatthi okathi uwo. Masi mwa enamuna emosa, eyo vakirwenly'aya, kaalavula ni Joseph.

20 Nto miyo—miyo khuweha osulu. Ni mwa mukhalelo ntoko epiraamite, ery'ene ohoolo waka, yaahikhala, axipalame axikhaani, oorakama ntoko isentiimeturu piili ni nuusu. Nto awo yaarisa, vasulu, murinttani, yaahikhala e. . . pooti wira, araru wala axexe. Vano, voottharana, erinta yootharana yaahikhala khino athanu n'araru wala muluko. Vano vathi vaya, yaahikhala muloko n'athanu wala miloko miili.

21 Vano awo yaari anakhotto axikhaani, okhala wira mapururu aya yaari ookhumuwa, ni yaakhalasa ntoko yaaphavela olavula ni miyo, ehimiyaka etthu. Vano miyo kaari Onikela nsuwa, vookhalaka ntoko oTucson, Arizona. Vano axipalame yaawehasa Onikhuma nsuwa. Ni miyo kaaniwiriyaana oratteene. Yaaphavela ohimya wira, yaakhalasa ntoko wira yaaphavela okileela etthu. Ni yaarinasa mapururu makhaani, othene yaari ookhumuwa, ni itthu siiso. Awo yaahikhalanasa makuma manci-ene a okhottoni.

Vano, naanaanoru, mwaapalame mmosa khupacerya okuxa nipuro na mukina, atuphaka *siisaale*. Vano awo, axipalame khurowa evavasaka voowaakuva, onikhuma nsuwa.

²² Vano varowans'aya, vaavo khurwa mwaapalame muulupale, oolattanexa ni ipompa, ni mapupha oothokolowa. Nto—nto—nto awo jaarwanse munikotoni, ni yaakuvasaka, owaakuvaxa waavikana apalame axikhaani, khuvavasa erowaka onikela nsuwa.

²³ Nto miyo nlelo mwa...miyuupuwelo soomiili vamosa, kaanisuwela wira keemenle va, ni kaanisuwela wira kaari nipuro nikina tho. Munnona? Nto miyo khuupuwela, "Vano, yoowoona ela, ni kihaana osuwela etthu enihimy'aya yeela."

²⁴ Nto niphiyaka—ru nikoto na nenli n'axipalame, kaahiweha Onikela nsuwa. Ni yaakhala ntoko mukhalelo w'epiraamite, ntoko aili wa khula epantte, ni mmosa vasulu, yaahirwa Malaikha mathanu ooweryaxa kitonko aka wona kookhalaru. Waakuva wootikiniha, kihinatoko aka wona. Miru saya suuramme—ene, mapupha Aya oothokolowa, evavaka vo waakuva! Ni owerya wa Muluku Oowerya sothene khukiphwanya, mwa enamuna emosa, khukikuxa okhuma vathi, okhuma vathi mpakha, osulu.

Kaaniwerya omwiiwa Joseph nlelo alavulaka.

²⁵ Ni jaarumme ntoko nsu ninvikana mukaano wa nsu, ni—ni erumelo yuulupale jaarumme, ottaiwene saana, mpakha Okuusini. Nto varoihiw'aka osulu...Nto waahikhala waakuva wootikiniha wa Malaikha! Ni ki—kinniwerya paahi wona Yaawo naanaano va, moone, okathi—okathi Awo waarw'aya, ni mukhalelo yoole *siisaale*, vo waakuva erwaaka wa miyo.

²⁶ Vano, kihilohaka, vano. Nnari. Kaari vaavale vene, oovenyane ene ntoko siry'aka vano. Munnona?

²⁷ Masi va Eyo yaanirwa. Ni Awo yaari oowaakuva vo woopiha—vo, mpakha kuupuwel'aka, okathi Eyo evenyaly'aya... Kaahiiwa erumelo eyo yaakhala, ntoko, ophuleya wala ntoko ophutuwa waarumme, ntoko mukaano wa nsu. Nto vairaneieye aya, miyo khuupuwela, "Ahe, ela ehaana ohimya wira kihanle okhwa, moone, mwa ophutuwa wa enamuna emosa." Nto—nto miyo paahi...Okathi wuupuwel'aka itthu iyo, miyo khuupuwela, "Nnari, khiyaarowa okhala yeeyo. Okhala wira, waakhanle—ru ophutuwa, waamumphwanya Joseph, nave. Okhala wira, owó ori vale, alavulaka nlelo, uupuwelaka wira kiri vaavale. Kinniwerya omwiiwa. Khayaari yeeyo."

²⁸ Vano, yothehe ela nlelo ti mwa yoowoona. Khayaari... Munnona? Waari muhina mwa yoowoona.

²⁹ Vano nto, naanaanoru, khusuwela wira kaahikhala... Awo yaahikirukurerya. Miyo nkaawerya owoona Awo, masi kaahikelihiwa munikhuruni mu na epiraamite ya Yaawo,

muhina mwa nikhuru nla na—na Malaikha, mathanu. Nto miyo khuupuwela, “Vano, Nlaikha na mookhwaani naarowa okhala nimoso. Mathanu yaarowa okhala mahala.” Miyo kuupuwela yeeyo. Miyo khuupuwela, “Oh! Eyo—Eyo enrwa ni Mutthak’aka. Eyo ethoka aka ya nenli. Awo anikiruuhelasa Mutthaka onkhuma w’Apwiya.” Vano kaahikhuwela ni ikuru saka sothene, vowiituperiya ntoko saawery’aka, “O Yesu, exeeni Nyuwo muntthun’anyu wira kiire?” Nto vairaly’aka siiso, Eyo ya—yaahikikhuma khurowa.

³⁰ Miyo—miyo—miyo nkiniisoonaka saana, okhuma vaavo. Munnona? Miyo kaari, nihiku nothene nsana, kaahaana okhala owaani, kihalelaka okhala oohiisuwela. Nkinwerya omaaliha muupuwelo aka. Ni ovuwa ni owerya w’Apwiya! Kaari othene ookhwa nantiirya, okathi Eyo ekihiyaly’aya. Kaaphavela ottikittha matat’aka. Nto miyo khuupuwela, “Nkinwerya omumula saana.” Vano kaamweetakasa, vathi, nno ni nno. Miyo khuupuwela, “Eyo enihimya-ni, Pwiya? Eyo enihimya-ni?” Nto, khweemela. Miyo khwira, “Pwiya Muluku, murumeyi Anyu ti. . . Nki—nkinwerya osuwela saana tthiri. Mwaha wa xeeni? Yaari exeeni ile? Musuwelihe, Pwiya.” Ahe, okathi e. . .

³¹ Nkinwerya wooleelani, kaahimya wira, “Owerya w’Apwiya.” Khiivo enamuna yo oleeliherya yeeyo. Kehiyo ele munoon’anyu va, mwa iparakha. Iyo iparakha s’Apwiya. Ela ti yooreerhiwa! Oh, wulu! Ti—ti yoovikana etthu p’itthu mutthu onookhwa aakhanly’awe wupuwelelaka. Munnona? Ni eyo—ni eyo yaanikihaaxa, vanci-ene. Khani. . . Kehiyo eparakha. Owo mukattyamiho. Munikhala ooxanka. Munnona? Ti yeeyo. Vaakhanle paahi wira mwaamuwerya. . .

³² Vaakhanle paahi wira kaaniwerya okhalana enamuna kaawery’aka waahimeerya atthu exeeni yaari yeeyo, wala etthu eyo. . . moonelo xeeni waari uwo! Eyo, kehiyo paahi ntoko okilaathi va, otthuna ohakalala. Eyo—eyo etthu emosa khula mutika mwa nyuwo paahi. . . Yoovikana woopopihiwa. Yoovikana otutuxiwa. Nttittimiho woowaarya. Wa. . . Miyo. . . Khiivo enamuna yo oleeliherya. Hata, mpakha, ottuli waka wothene, osulu ni vathi va muthan’aka, mwa ikatha saka, osulu ni vathi va inawu saka ni ikatha, omutthu aka wothene waahikhuwa nantiirya, moone, ntoko wira mwa—mwaarookhuma molumwenkuni, nipuro nlo. Ni—ni yaanikihiya, vakhani-vakhani, vano miyo khuwiirela a—Apwiya, “Munookihiya osuwela, O Muluku?”

³³ Kinoona, wira, yoolikanaxa yaatonko okhala-tho ya ikuru siisaale, waari okathi waary’aka oZuriki, oSuwiisa, okathi ule Awo yaakoonihaly’aya Xawawe a wAlemaanya anwehaka nakhavalo ole mwInkelesi aarwa aviraka wAfrika. Nto Owo khwira, “Atthu othene aattheke ni aathoiwa ovuwa.”

34 Ni miyo kaanaavekela Apwiya, wira ekikhaliherye. Ni miyo—miyo kintthuna wira Awo ekivahe mutaphulelo, okhala wira kaaniikoha sinto yaahimya wira—sinto yaahimya wira kaamurowa, kaarowa okhwa. Nto vakhala wira yaari siiso, nkaarowa waaleela amusi aka hat'etthu ya yeeyo. Waakhanlene okathi aka wo orowa Owaani, vano, kinoorowa Owaani tu, ti yeeyo tu. Masi vakhala—vakhala wira yaari yeeyo yaahimya'aya, nkaatthuna waaleela amusi aka, nkaatthuna wira awo esuwele etthu ya yeeyo. Kaamuhuya paahi wira yiiraneye, nto ya—yaamukhala yeeyo tu.

35 Miyo khwira, “Pwiya, mukikhaliherye. Nkintthuna waaleela amusi, vakhala—vakhala wira Nyuwo mu . . . Ela, nno wakhala ti wihaniwa waka orowa Owaani, ahe, kino—kinoorowa.” Moone. Miyo khwira . . . Nto, moosuwela, nyuwo mu . . .

36 Nyuwo muniira, “Ahe, mwahuupuwelenle-ni ele muhimaly'anyu mwa yoowoona, ele yaahimya yoowoona?”

37 Masi khamunwerya wuupuwela itthu ntoko yeeyo okathi uwo. Nyuwo . . . Nkinwerya, khula enamuna. Nto miyo khuupuwela . . . Kaari ooxanka paahi, oowuukhuwa. Khamunsuwela moota wo wuupuwela. Khamunwerya wuupuwela.

38 Nto miyo khwira, “Tithi a Wirimu, vakhala wira eyo yaahimya wira—wira erumelo emosa yaarowa okikuxa, ahe, mukihye kisuwele vano, wira kihihimye hat'etthu ya yeeyo. Ovuwa Wanyu ni owerya okirweele-tho, okirowane-tho osulu. Wala, muhiye ovuwa Wanyu okirweele, vano nto kino—kinoosuwela nto wira yaahimya—yaahimya yeeyo, nto siiso kinoomaalela mmansaka.” Nto khuhikhumelela hat'etthu.

39 Siiso nto miyo khwira, “Weso, Pwiya, vakhala wira yaahimya wira munrowa waaveleliha Anamitthaka Anyu wa orummwa waka, nto muhiye owerya Wanyu okirweele-tho.” Eyo yaahala okikumihia mpaani!

40 Nnya, miyo—miyo kaahitthikela, ni Bibilia aka mmatatani, vano, moone, ni kinvekelaka Muluku wira akikhaliherye. Vano vairaly'aka siiso, Owo—Owo aahikooniha mwa Soolempwa, yaari ya yeeyo, vaavale vene. Nto miyo khuupuwela, “Yaamukhala yeeyo vekeekhai? Kiirale sayi yeeyo?” Nto, oh, miyo—miyo nkinwerya otaphulela itthu iya, mw'atthu. Yoovikana etthu p'itthu ensuwel'aka. Munnona?

41 Amwaar'aka muthiyana mmosa oomeekha, mmosa w'ale oolokaxa mulaponi. Masi, okathi vakhani, nkaahimye etthu ya yeeyo. Kaahikelela ohoolo. Awo yaahisuwela wira yaahikhala etthu yaakhumelenle. Vano okathi waahimenry'aka, awo khwira, “Moosuwela, Bill, kinniwoonani ni owiiwani, mwa itthu sinci-ene seiyo.” Khwira, “Moosuwela miyo kinniwaaminini ni murim'aka wothene,” awo khuhimya. Awo khwira, “Masi ele vekeekhai yaahikhhalana etthu.”

⁴² Eyo vekeekhai, ennikithukumeliha, erumelo ele ni orwa iwe wo waakuva wa Malaikha ale siisaale, mathanu a yaawo vamosa, mu—munikhuruni na yaawo. Oolikana, ntoko—ntoko waarin’aka epiraamite ele yookwerethiwa va, moone, yaalikana ni yeeyo, voopacerya, awo yaakhala ntoko, ntoko e . . . voorakamela, awo yaakhala ntoko nthepa na ipompa. Ni yaarisa mu—erwaasaka empantt’ila *nno*. Ni yaarisa, yaalikana ntoko, nimosa, maili; mararu, maxexe; vano nto nimosa vasulu vaya, moone, emalelaka mathanu. Ni yaarwaasa ni waakuva saana! Khiivo etthu, nnakhala matteeke, nnakhala hat’etthu enlikanan’aya *yeeyo*.

⁴³ Ni kinniweya owoona tu, ni miru saya ntoko wira yaaroorukunxa. Mapupha ale yaarukunxelanse ottuli, ni ikaruma sothene, nto va awo anoorwasa, so “Fiuu!” Ntoko *siiso*. Khukhuruwasa naanaanoru, khukikuxa mpakha mupiraamiteni mu ya nikhuru na yaawo. Kaahoonu wira kaahikuxiwa, kaahikumihwi vathi. Miyo kuupuwela wira khino . . . Kaahiwa, ottaiwene, erumelo eyo, “Vuum!” Ntoko n—n—nteeke naavikanaka mukaano wa nsu, nyuwo mootoko wiiwa wiiraneya *siiso*, ntoko erumelo ottaiwene.

⁴⁴ Miyo khuupuwela, “Ela pooti ohimyaka wira vano, yoowoon’ela yakihya—ru, wira kinrowa okhwa mwaha w’etthu enrowa ophutuwa wala etthu *siiso*.” Miyo khuupuwela, “Miyo kiri va. Koovenxiwa. Kiri . . . awo, awo arisa va nipuro nlo, kiri—kiri mwa yeela, epiraamite ela ya Malaikha va. Masi, nki—nkinsuwela. Khino Apwiya anoorwa okikuxa okirowana Owaani.”

Vano kaahimwiiwa Joseph vathi vale, airaka, “Paapa?”

Khuupuwela, “Nnari, yaakhanle yeeyo, yammukuxa yoowo, nave—tho.”

⁴⁵ Vano Etthu emosa khwira, “Nyuwu . . .” Muupuwele, miyo kinoolipelela, kiwiriyanaka Mutthaka mmosa kaalipelel’aka kweekwe, etthu emosa.

⁴⁶ Vano yoowoona, nihiku nle, moosuwela, kaarin’aka nno woohikhala khalayi, ekileelaka sa etthu yaarowa okhumelela, moota kaalaley’aka, opacerya nsuwa, mpakha nipuro nla. Vano—vano nto Owo khwira, “Vano muupuwele, ethoka ya nenli ehanle orwa.”

Miyo khuupuwela, “Onookhala Mutthaka mmosa.”

⁴⁷ Munnuupuwela Mutthaka aka va? Otthukuliwa wa nluku nle noomaliherya, vaavo, masu ale mathanu na maili ni ikanyeryo sihilempwe hata mwa Masu a Muluku. Munnuupuwela? Ni eyo yaahikihela mupiraamiteni mme.

⁴⁸ Nto Junie Jackson, mwaary’ene vaava, yooloha ele mwaakitharihenly’anyu voohikhala khalayi. Nkinrowa ohimya voosiis’ula. Nyuwu mwaari o . . . Muluku aari oolikanaxa. Nto

mukilevelele mwaha wo ohoovahani otaphuleliwa waya; okhala wira, kaahoonaa etthu yeettaka.

J. T., etthu emosaru, moone. Ni miyo—miyo—miyo kaahisuwela eyo.

Vano Munna Collins muthiyana, voolikana-ene emosaru. Munnona?

Ni thanu sa seiyo, sithoonyaka etthu emosaru voolikana-ene.

⁴⁹ Vano nto yoowoona kohimenry'akani nyuwo othene, iyaakha sivinre, ehiiraneya nihiku nikina. Munnona? Eyo yaamwiiraneya.

⁵⁰ Nto eyo eri vo, voolikana, yothene yiiraneyaka voolikana-ene vale. Eyo etthu paahi eneetteetta. Miyo nkinsuwela exeeni. Muluku akikhaliherye; mavekelo aka.

Nivekele.

⁵¹ Tithi a Wirimu, hiyo n'a—n'atthu ninkhwa paahi, nto neemenle va voosiis'ula. Nto, Pwiya, miyo. . . Nyuwo mookiruma wira kihoolele nikoto nla naamukhaani ni ekerej'ela. Vano kiri woomalelani waka. Nkinsuwela ephiro xeeni, xeeni, ti vayi enrow'aya orwa. Masi kinnisuwela etthu emosa ela, wira, Nyuwo moohimya wira mwaamwiiriha "itthu sothene weetihereya vamosa wira areerihwe ale" anoophentani Nyuwo ni yiianiwe vootthuna Wanyu. Miyo kinnoovekelani, Muluku, wira ntata Nanyu nuulupale na omoriwa ikharari nikhale vasulu vahu.

⁵² Hiyo vekeekhai ninnisuwela wira Nyuwo mwa Mulukuu. Ni ninnisuwela wira Nyuwo khamuhiyo ole aakhala khalayi, masi Nyuwo nlelo mookhala olelo. Nyuwo kweekwe mwaari Mulukuu. Nyuwo kweekwe munookhala Muluku. Nyuwo mwaari Muluku ohinatthi okathi, ni munookhala Muluku waahikhaleru-tho okathi. Nyuwo nlelo munookhala Muluku.

⁵³ Nto hiyo niri mmatatani mwAnyu, Pwiya. Hiyo na oloko paahi, nto Nyuwo mwa Namapaka, Mulipa-oowuupa. Mpake makhalelo ahu, Pwiya, wa enamuna yo ovara muteko wooreeraxa wira noottittimiheni Nyuwo. Munivahe, Tithi. Hiyo niri mmatatani mwAnyu paahi.

⁵⁴ Hiyo khanaarina hata enamuna yo wiiruuha mmansihu va, wala khaninsuwela moota onrow'ahu okhuma. Apwiya, Nyuwo munninivaha ekumi, ni Nyuwo muhaana. . . Hiyo ninnivahererya ikumi sahu wa Nyuwo, ni, mwa yeeyo, Nyuwo moonivaha, ntoko mwaakakhanyo, Ekumi Ehinimala. Waamini wahu onnimumula yeeyo mwa omutthu ahu. Ni hiyo ninnoophentani Nyuwo mwaha wa yeela, okhala wira noosuwela wira nihiku nlo ninoowoonani Nyuwo, ni Nyuwo munrowa okhala moovuwani mwAnyu. Vano hiyo ninoorowa onweha Owo. Ni hiyo ninniwehererya wiiwa moolumo ala, "Vaareera saana, murumeyi aka oorumeya ni oororomeleya. Nvoloweke moopuhani mw'Apwiya, mutthokiheriw'anyu

okhuma opattuxiwaka-ru olumwenku.” Mpakha okathi yoowo, O Muluku, othene naathukumanaka, munihooole.

Hiyo n’arumeyi Anyu, ni ninvekela oleveleliwa itampi sahu.

⁵⁵ Soowoona iya soowerya, Pwiya, ti soowaatta wa murumeyi Anyu. Nkinsuwela yo wira. Miyo—miyo kinsuwela paahi wira sinimoorwa. Ni kinwerya ohimya paahi ele koonaly’aka, ni ele yaahimmwe. Ni imaara sikina eyo ennikoopopiha, Pwiya. Ni miyo—miyo kinniikoha etthu yo wira.

⁵⁶ Vano kinnimukuxa Bibilia n’usoma memmo moota Yesaya soonaly’awe khino nihiku nle mpaani m’olompa, okathi woonaly’awe Malaikha ale, mapupha ekhuneelaka inawu Saya. Khivanxankiha vaakhuwenly’awe, “Kootakhaliwa miyo! maana maitho aka ahoona ovuwa w’Apwiya.”

⁵⁷ Nto waari okathi yoowo profeta aakhuwenly’awe: waamanly’awe oreerihiwa mpaani m’olompa, okathi Nlaikha naakuxaly’aya ipano khukuxa nikhala na Mooro khukwannya iyano sawe; vaamanly’awe olapa wira owo aari mutthu a iyano soonanara, ni aakhala ni, eriyari y’atthu ootakhala. Nnakhala vo, owo aari profeta. Nlaikha naahikuxa ipano khuhela nikhala na Mooro iyano sawe khimureeriha, khwira, “Vano rowakani, mwalaleerye.”

Pwiya Muluku, Yesaya aahikhuwela, “Miyo kiri va, Pwiya. Kirumekeni.”

⁵⁸ Okathi, Awo yiiraly’aya, “T’ani onrow’ahu omuruma?” Wa nloko nle nootakhala ni noohiwelela!

⁵⁹ O Muluku, mutthuniherye-tho. Mutthuniherye wira yiiraneye-tho, O Pwiya. Nveleelihe Eroho Yowarya ni Mooro wooreeriha. Maana, kinnihimya, ka mutthu a iyano soonanara, ni kinkhala elapo ela va n’atthu ootakhala. Ni hiyo n’atthu ootakhala vamaithoni Vanyu, Pwiya. Masi, oh, nveleelihe owerya w’oreeriha, Eroho Yowarya! Munireerihe, O Pwiya. Mmureerihe murumeyi Anyu, Pwiya.

⁶⁰ Vano nto mulavule, Pwiya. Murumeyi Anyu onniwiriyanana. Kinniwehererya wiiwa Nsu nenlo. Miyo ka Awinyu. Mukirumeele, Pwiya, ntoko sinoon’anyu ophwanelela, okathi onkhal’aka waltaari Wanyu. Mutthuniherye Eroho Yowarya ekirapihe, Pwiya; ekireerihe ni ekirume, Pwiya, Nyuwo mwamutthuna vale mutthu wira arowe, vakhala wira ela ewoora ni wira ola p’ukathi.

⁶¹ Miyo—miyo nkisuwenle, Pwiya. Miyo—miyo kinsuwela paahi wira kihoona Malaikha ale. Ni Nyuwo moosuwela wira itthu iyo ti Ekeekhai voolikana. Nto kinnivekela, Pwiya, “Kootakhaliwa miyo,” tivo mukikhaliherye.

⁶² Nto vano mwaareerihe atthu ala. Ni hiyo niri va olelo, ohinatthi waattamela okathi ula wo otthapela oyariwa wa Pwiya’ahu. Ninvekela wira Nyuwo munikhaliherye.

⁶³ Nto voosiis'ula, murumeyi Anyu, Munn'ihu Neville, ohoona wira khino waamukhala okathi orin'awe omumula okathi vakhani, nto khino kihaana olavula. Ni ki—kinvekela wira Nyuwo mukikhaliherye vano.

⁶⁴ Va aakhala amosa-amosa, Pwiya, ni hiyo othene, ninnoophavelani Nyuwo. Tivo ninnivekela vano wira Nyuwo munireerihe okathi onsom'ahu Masu Anyu n'utthokelela okathi vakhani. Eroho Anyu enirweele, Pwiya. Ni enirapihe ni enikhalihe mwa Mooro, ni Eroho Yowarya, ni Mutthaka wa Muluku, musya okhuma waltaari, wira nittikinye olumwenku onluwela, ohinatthi waattamela wa Muluku muulupale Ohinimala. Vano ninnivekela mwa Nsina na Yesu, Mwan'Awē oophentiwa, ni Moopoli ahu. Amen.

⁶⁵ Vano kintthuna nwiriyane Soolempwa kamosa-kamosa va, ni sookwerethiwa vakhani, kilepaly'aka.

⁶⁶ Ni kookupali wira, Doc, ahiiso Billy, wala mmosa a awo ookileela, wira onthhuna okhuma vahilekenle, mwaha w'anamwane. Sookhalaniwa soovaha kamosa-kamosa sa yaawo.

⁶⁷ Nyuwo axinamwane munammalaru okhuma exikol'anyu ya Ttiminku, mu—muhale paahi, okathi vakhani paahi. Enihimy'ahu va pooti okhala yo wiixeryaxa wa nyuwo, masi nyuwo—nyuwo mukilaathase n'amaama ni apaapa, minuutu vakhani paahi. Kintthuna olavula ni yaawo.

⁶⁸ Vano, mwa Masalmo, Masalmo 89, kintthuna kosome eversiikulu emosa wala piili, ya Masalmo 89. Kinrowa wehererya osoma iversiikulu 50, 51, ni 52 ya Masalmo 89.

⁶⁹ Vano, nyuwo othene munniwerya wiiwa orattene, ottuli? Mwaaweryaka vale, nvenxe matata. Wira ki...Ekhanle e...Miikoro iya sothene soothukuliwa? [Ookhala oniira, "Nkisuwenle."—Mol.] *Ola* ti woolikana, wala *ola*? *Ola*? *Ola*? ["Iya miili epant'ila nno soothukuliwa."] Vaava va, *iya* miili epant'ila? ["*Ola, ola, ni ola.*"] Vaareera.

⁷⁰ Nkisuwenle sinto enookaravariwa ela wala nnari. Ela yookhumelela ntoko yo ohiwehereriwa voosiis'ula.

⁷¹ Masi muhiliyale vano, mwaaruhe apatthan'inyu othene. Ni ki—kintthuna wira mukupali, wira, mwiire sinwery'anyu wira mukhale muthukumano wa Ettiminku enrwa.

⁷² Naanaano enoomalihiwa ekereja nno, wona waka. Vano ki—kinoothhika nto mwaha wa yeela, olaleya Ikanyeryo iye Thanu na piili, wakhalaru otthuna wa Muluku, va Yoolempwa ela va.

⁷³ Muliivuruni mwa Masalmo, kapiitulu 89, opacerya versiikulu 50. Nwiriyane saana osommwa wa Masu vano.

Muupuwele, Pwiya, oveehiwa w'arumeyi anyu; kinnivilela vatthirima vaka oveehiwa n'atthu a maloko othene;

*Yaawo awanan'inyu aveehalyaya, O PwIYA;
aveehalyaya mavalu a ole omuttikitthenlyanyu.*

Ettottopeliwe APwIYA mahiku othene. Amen, ni Amen.

⁷⁴ Kaatthuna kilavule ni nyuwo okathi vakhani mwaha wa . . . Kintthuna wira mukwerethe yeeyo, toko, nto musome imaara sinci-ene, oratteenexa. Khino vannireerela osoma naanaano va. Nwiriyaane oratteene vano. Munnona?

*Muupuwele, Pwiya, oveehiwa w'arumeyi anyu;
kinnivilela vatthirima vaka oveehiwa n'atthu a maloko
othene;*

*Yaawo awanan'inyu aveehalyaya, O PwIYA;
aveehalyaya mavalu a ole omuttikitthenlyanyu.*

Ettottopeliwe APwIYA mahiku othene. Amen, ni Amen.

⁷⁵ Musome Yeeyo oratteene, ntoko Davidi silavunly'awe. Kintthuna kirumeele ntoko yoosoma . . . Ti yootikiniha saana, emaara ekina yoosoma ya Natale; masi ntoko silaleiy'aka Ettiminku evinre yoosoma emosa yootikiniha. Kinooliyala vano yaari exeeni. Waari e . . . [Munna mmosa oniira, "Olumwenku Onoophomowa Kapatti-kapatti."—Mol.] Mwinre sayi? ["Olumwenku Onoophomowa Kapatti-kapatti."] Ophomowa: *Olumwenku Onoophomowa Kapatti-kapatti.*

⁷⁶ Vano kintthuna kirumeele ntoko yoosoma, Ettiminku ila: *Oveehiwa Mwaha Wa Masu.* Vano mukihye kitthikele-tho, saana. O . . . *Oveehiwa Mwaha Wa Masu.*

⁷⁷ Muluku ookhalana okathi, ni niwoko na okathi yoowo, wira amaliherye Masu Awe othene. Muluku onnisuwela saana etthu Owo onrow'awe wira. Hiyo khaninsuwela. Hiyo nihaana waakhela paahi ntoko Owo sinnivah'awe. Masi, Owo onnisuwela, ni khiivo enrowa okhumelela voovonyeya n'ile Owo—Owo uupuwelenly'awe wira. Yothene eyo ehaana wiiraneya. Imaara sikina, sihaana okhala, itthu soolipa ni soorika, wira ekumiherye ekeekhai, mukhalelo w'ekeekhai w'etthu.

⁷⁸ Moosuwela, epula eniyariwa osulu wooverunya, woowalakakha, wo owali, wa itari. Vano nahaakhalanne epula, khanaarowa okhalaka. Masi munnoona etthu entthunaneya wira eruuhe epula? Etari, okukutteya, overunya, owali. Nto vaavo ti vankhuma epula.

⁷⁹ Epyo ehaana okhwa, wuntta, opahuwa, wunkha, ni otthikela mutthayani v'elapo ya vathi, wira ekumiherye ekumi esya.

⁸⁰ Eweero vantthuneya omaniwa, orukunxiwa khurukunxiwa, nno ni nno, n'umaniwa mpakha ipaphala sothene okumihiwa. Kahi okhala wira ennaarya, mwaha wa pirita a yuuma, ele ensuweliwa ntoko eweero y'anaanepa, ennaarya ntoko eweero y'ekeekhai. Masi, muhele soopiili vamosa . . . nvalaanihe epantte emosa, enimoorikelani ovirikaniha, masi muhele vamosa,

munoowerya ovirikaniha. Nto namamana kweekwe ohaana omana mpakha owo—owo wona ethoni awe yooneelaka muweeroni.

⁸¹ Nto Muluku onnilamulela okathi ni ohaana etthunelo ya itthu sothene Owo oniir'awe. Khiivo hat'etthu eniiraneya v'ehasara—vo w'ale anaaphenta Apwiya ni yihaniwe ni wihana Waya. Munnona? Hiyo nirootthommwa. Ni sothene sinvara muteko oratteene, wa yeeyo, okhala wira Owo khokhanle woothaka. Ni Owo ohimye wira eniireya siiso, wira sothene sihaana okathi aya, ehuhu aya, ni sihaana enamuna aya. Ni Muluku ori ottuli wa khula mweettelo. Nto imaara sikina munnuupuwela wira sothene sineetta voohiloka. Eyo ti yawihu. Itthu iyo ninheleliwa hiyo, wehereriwa ni mixankiho. Iwo wehereriwa, wira noonwe moota onrowaahu waakhula eyiiraneyelo.

⁸² Okathi vakhani ovinre, oVermont wu, Munna Fred ni miyo naaronwe epantte yo Nova Yorke, epantte ekina ya Nthiya Champlain, vano khuvira epantte ya Nova Yorke. Nto kaahiwela vamwaako vaavo, vasulu va Mwaako Hurricane, weiwo kaaxayak'aka. Nto weiwo kinnuupuwela okathi waarimenly'aka, ni moota Muluku aakiruuhaly'awe akittikihaka, ni Eroho Yowarya paahi, orumaka mwanankhaya. Vaavo, kaarowaaka wira kikhwiye, kipweteiye, ni amwaar'aka ni Billy, yaari ohitto mmuxaaxani mwaamukhaani imiilya khata. Nto miyo kaahirimeela saana.

⁸³ Ni yaahikhala etthapwe vakhani waavir'ahu—mo, wira nipiye omuxaaxani, epaceryka—ru ephovo. Nto miyo keemenle vale kilavulaka ni Munna Fred, vano Eroho Yowarya khwira, “Mukhume meekh'inyu.” Vano miyo khukela mutakhwani vakhani, nipuro nlo. Awo khukileela, “Nookhala ntapha murei'anyu. Paasoopa vano.” Masi Awo khayaakihimenrye sayi, exeeni. Miyo khuhokolowa khimuhimeerya Munna Fred.

⁸⁴ Kaahirowa okereja ohiyu ule mpaani m'othukumana, khwaahimeerya atthu. Vano ohiyu wootharelana khwiiraneya. Vano keemenle—ene vale okathi Awo yaakihimenry'aya, mwaha wa anamanyemula kamosa—kamosa, Awo khwira, “Eri mmatatani mw'anyu. Nwiirihe entthun'anyu. Etthu p'itthu munihimy'anyu, enimwiiraneya naanaano va.”

⁸⁵ Eyo vo. Mwaha, wa mutthu oohittitimiha, ootakhala, nto awo yaamuveehasa ni onyemulasa vamuthukumanoni, mmiravo mmosa ni mwali mmosa. Nto owo ehererya ompecari ni onvara—vara voochifayi mpaani; vano yaaniwehasiwa n'atthu othene, okathi waaphavel'aka olaleya. Vano aanirukunxa muru awe n'uwela ottuli wawe, n'urukunxela muru awe ottuli n'uphavela ompecari, ni yiirasaka siiso vamuthukumanoni, evaraka murima.

86 Nto Eroho Yowarya khwira, “Vano owo...Awo arisa mmatatani mw’anyu. Munrowa owiirihha exeeni?”

87 Waahikhala mmaaleleyo wa nttittimiho. Athu othene khukhala oomaala vookhwa. Nto miyo khuupuwela, “O Muluku, kiireke exeeni?”

88 Vano miyo khuupuwela, wahaakhanle olopola wa Eroho Yowarya, mahiku maili eyo ehinatthi. Miyo khwira, “Kinimoolelevelani.” Vano, ti yeeyo Eyo yaatthun’aya wira kihimye. Munnona?

89 Okhala wira, vookiserya, miyo—miyo kaamuttheka, khino woohikhala mwaha wa yeeyo, masi kaamuttheka. “Vano ottheka mwa ele ekhaanixa onkhala wa sothene.”

90 Nto miyo khwira, “Kihoolelevelasani.” Ni aakhala anamoona akilantho vaava naanaano, yaari weiwo okathi uwo. Vano Eroho Yowarya khukhuruwa.

91 Vano, moone, kinnaamini wira itthu iya sothene saahikhalana maana. Mwaarowa wira exeeni ni owerya? Mwaarowa wira sayi, moone, waakhula wa mwiirelo? Ethu enoorwa ntoko mwiirelo, vano nyuwo munaakhula sayi mwiirelo owo? Munniiwa saana enihimy’aka? Mwaarowa wira exeeni? Nto khino sothene iya siireiye wira siniruuhe vary’ahu vano. Miyo nkisuwenle. Miyo—miyo nkikhanle ohimyaaka. Masi kweekwe ennikhala enamuna emosa. . .

92 Nto muupuwele wira, oveehiwa wa—wa Masu ohaana... Masu kweekwe anniphwanya oveehiwa. Wa okathi wothene, Masu a Muluku ooreerihwa ankhala ooveehiwa. Nto mwaha wa yeeyo enkhal’aya yoorika w’athu ahinsuwela saana, osuwela moota w’okupali oveehiwa iwo.

93 Munniwerya owuupuwela awiixutti etthikaka ni ehakalalaka yaahithokelela wira yaahaalakeliwa ophwanela ovilela oveehiwa wa Nsina Nawe? Owo iirale, “Othene ale ankhala vooreera murima mwa Kristu anoophwanya olupatthiwa,” oveehiwa wa Masu.

94 Nyuwo okathi wothene muhaana ovilela oveehiwa nno wira nvire mo wehereriwani, wira moone. Khula mutthu onrwa wa Kristu ohaana toko oxuttihwa ntoko mwaana, mwaha wa—wa niwoko Muluku oothokiheny’aweni. Ni muupuwele, mwaaweryaka—ru paahi okhala oomaala! Muupuwele, vakhala wira Owo oowiihanani mwaha wa yeela, khiivo ekhanle okhottiheryaka eyo wiiraneya. Khaavo axetwani anipherya moohaaxani, wira ekhoottihe wooniheriwa wa Masu a Muluku. Nyuwo muniyareliwa etthunelo emosa, ni khaavo mutthu onwerya okuxa opuro anyu. Pooti okhalana anamatakiherya ni sothene sikina, masi awo khankhalakhala ekuxaka opuro anyu. Khweeli. Masu a Muluku anooxintta. Khakhanle ovonyaka. Ti vaavo vantthuney’aya khula muKristu weemela-vo, osuwelaka yeeyo—yeeyo. Nto wehereriwa onimoorwa, ni ntoko wira

sinkhuma khula ephiro, wa nyuwo. Masi muupuwele, Muluku ohaana ethhunelo, nto sothene sinookhala saana.

⁹⁵ Vano nrowe nuupuwele paahi so—sookhumelela kamosa-kamosa sa Masu a Muluku yaamaliheriw'aya, n'ale yaakunxe Masu mwa okathi aya.

⁹⁶ Miyo—miyo kaahiisoona okhala muRohoni, woohikhala khalayi, wira aahikhala aakuulumela. Siiso okhanle-ene wo owiriyaniwani ifiita. Mwaha wa kweekwe ohimiyaxaka, otthikela ottuli ni waaromola atthu a mBibiliani wa etthu enihimiy'aka. Ahe, miyo kiniirela niwoko nimosa. Bibilia ohimye wira itthu iya silempwe wira hiyo nitthokeleleke seiyo. Nto eyo t'inamuna emosa paahi, vahikhanly'aka oosoma, enamuna emosa paahi kikhanly'aka wira, ohimiyaka s'ottuli ni wira, "Nkoonani vatthu mwiirelo *ola*, etthu yaakhumelenle yeeyo, vatthu yaakhumelenly'aya *ela*." Munnona? Vano nto nyuwo munimwiihela memmo tu.

⁹⁷ Ntoko saalaley'aka, woohikhala khalayi, mwaha wa mwammiravo mmosa mpaketini, moosuwela, ni—ni kapitawu mulweene aamookhwa. Owo aanwereiwa. Vano aahikoha sinto khaakhanle Bibilia mpaketini. Vano aahikuxiwa mwammiravo mmosa aarina Bibilia, vano owo khurwa khimusoma Yesaya 53:5. "Owo ohaaxeriwe mwaha wa sootheka sahu onyakatteliwe mwaha wa sootakhala sahu." Nto owo khwira, "Mukihye e . . . Mukihye kooleleni, kapitawu, moota ame aka yaasomak'aya yeeyo." Khwira, "Va t'inamuna awo amulempy'aya: 'Owo ohaaxeriwe mwaha wa sootakhala sa Willy Pruitt. Ni Owo onyakatteliwe mwaha wa Willy Pruitt. Ni itthu iya sothene Owo siirihw'awe, saari mwaha wa Willy Pruitt.'" Nlo naari nsina nawe.

Kapitawu mulweene khwira, "Okisivela yeeyo. Mwaamuwerya osoma nsina naka vaavo?"

⁹⁸ Owo khwira, "Kinimweehererya." Nto owo khwira, "Owo ohaaxeriwe mwaha wa sootheka sa John Quartz. Owo onyakatteliwe mwaha wa sootakhala sa John Quartz. Vano ni makhwatta Awe John Quartz oovonihiwa."

Owo khwira, "Kinnoona." Vano Apwiya khunvoniha. Munnona?

⁹⁹ Musome nsina nanyu memmo. Owo ohaaxeriwe mwaha wa sootheka sa William Branham. Owo onyakatteliwe mwaha wa sootakhala sa William Branham. Owo iirale eyo mwaha wa miyo, ni Owo iirale eyo mwaha wa nyuwo. Musomeke nsina nanyu vaavo.

¹⁰⁰ Ahe, ti siiso enikisivel'aya waaruhela Soolempwa a—atthu aka, t'ile Owo iiraly'awe mwaha wa mutthu mukina omwiiwelenle Yoowo. Etthu Owo omwiirenly'awe mutthu mukina aari oororomeleya wa Etthunelo, ni etthu Owo omwiirenly'awe mutthu mukina aari oohiroromeleya wa

Etthunelo, vano musome nsina nanyu vaavo. Vaakhanle wira mwaahikhala weiwe, mukhalelo xeeni mwaarow'anyu okuxa? Ni muupuwele, mookhalana oreeriwa, olelo, wira mukuxe mukhalelo mmosaru.

¹⁰¹ Okathi, Nowe, mwa oveehiwa wa Masu Muluku aamuhimenry'awe. Nowe, waahikhala oveehiwa. Nowe aakhala okathi mmosa wa siyensiya, saakhanly'aya ipakelo sa siyensiya awo yaawery'aya opaka, saari soovikana etthu p'itthu nipakaly'ahu olelo. Awo yaarisa, oocencyaxa oosuwelaxa. Siyensiya aya aari oopwaha saana, onvikana awihu. Nto muupuwele paahi, owo aahaana ovilela oveehiwa wa Masu owo aalaley'awe, miyaakha imiya piili ni miloko miili, wiitho w'anamanyemula. Inamuna saya sa siyensiya saahiwooniherya wira khiyaakhanle hata epula osulu. Masi, nnakhala vo, Nowe aahiiwa Masu a Apwiya, ni Awo yaari oovirikana ni muupuwelo aya wa Yaawo. Tivo, ekumi awe ehinatthi woopoliwa, owo aahaana weemererya owiitho ni ovilela oveeha anamanyemula ala yanveeh'aya-no.

¹⁰² Oh, khivanihovereya, awo khino yaanimoona othunku mulaleyi mutokweene ole. Awo khayaarina omoomola wala etthu p'itthu, okhala wira khino khiyaakhanle mampa mancienene a muthinto yole mahiku ale. Owo aari oohipahula. Owo khaarowa omunanariha hata mutthu, tivo awo yaahimuhiya mmansawe. "Rowakani ohoolo, mulweene namathipelela osulu iwe epantte ya mwaak'ole, atekaka ekalawa wenna nno ohikhanle maasi. Oh, ahe, humu oohaawa! Masi," ni yiiraka, "munrowa ophwanya vayi maasi anyu, wira mphempihe ekalaw'anyu, Nowe?"

"Anrowa okhuma osulu."

¹⁰³ "Ethiru. Hiyo ninniweya ophiya omweerini ni ittheneeri, ni rataari," etthu p'itthu yaarin'aya. "Khiivo hata epula osulu iwe."

Masi owo khwira, "Muluku ohimnye wira Owo onoorowa ohela-wo osulu iwe."

"Owo onrowa wira sayi?"

¹⁰⁴ "Owo mwah'Awe. Etthu emosa paahi erin'aka wira woolopolani wira mukhume va."

¹⁰⁵ Enlikana ni siiso olelo. "Mooro onrowa okhuma woowi?" Munna, ti yowooneyaxa olelo ovikana saary'aya okathi wa Nowe. Hiyo nihoona nipuro ory'aya. Voolikana wira ophule, eyo ti yothene. Siyensiya oomala... Khiivo etthyawelo ekwah'ela, nnakhala, okhala wira siyensiya oophwanya. Ayo, mulopwana.

¹⁰⁶ Tivo vano ninnoona wira yaari etthu yoowoopiha. Tivo awo yaanimoona othunku mulaleyi mulweene, nto yaahimuhiya paahi. Yaari etthu yootikiniha, khino, w'atthu ale, wuupuwela wira mulopwana mmosa ooneya ntoko okhala oosuwela, ni waamini wira Muluku, Mpattuxa erimu ni vathi, aamwiira

etthu, wala ohimya etthu Owo aarow'awe wira yaari yoovirikana n'inamuna saya so wuupuwela, etthu awo yaarin'aya. Khino nyuwo khamwiiwale saana. Nkawehani. Yaari... Awo yuupuwela wira yaaniwerya wooniherya khula etthu y'ephattu ni siyensiya aya. Eyo yaahikhale enamuna y'olumwenku onkhal'ahu olelo, olumwenku w'ankhili, w'osoma woosareya siyensiya! Nto etthu p'itthu awo yaawery'aya wooniherya, wira yaahivonyeya, Muluku... "Khaavo hata Muluku aarowa okhalakhala alavulaka etthu p'itthu (yaari) yaaweryaneyya wooniheriwa ni siyensiya wira khiyaakhanle iwe."

¹⁰⁷ Vano, awo arina ankhili yaawo olelo. Meetiku anyu ahimya-ru wira muhaana kankuru, muhaana okhwa, ni siyensiya onooniherya wira muhaana kankuru, ni ori ni mukhalelo wootepa, enkhala ethiru wuupuwela etthu p'itthu evirikanne, okhala wira munrowa okhwa; ti yeeyo tu. Siyensiya onihimya wira munrowa okhwa. Awo ahoomwaleyani, nto ti yeeyo tu. Munrowa okhwa. Ni awo anuupuwela wira onkhala ololo nyuwo mwaphavela-ru ohimya wira Muluku oolaiherya wira. Moone, ntoko saary'aya wu, muhaana weemererya oveehiwa iwo.

¹⁰⁸ Awo aniira, vakhala wira meetiku oohimya va, "Hiyo noomwaleyasa, nto kankuru khoreere otepa. Hiyo nihoohulani. Omwarenle mw'erutthuni mwanyu yothene, ni murim'anyu, mmasasuni mwanyu, muhapani mwanyu, mapuro othene. Ti yoohiweryaneyya."

Tivo, moone, mwaahimyaka wira, "Masi owo onookhala, khula enamuna."

Awo aniira, "Ahe, mutthu namuhaawi, mmuhiye."

¹⁰⁹ Kinnuupuwela ohiyu. Bill Hall, Munna Hall wu okereja y'oMilltown, anci-ene a nyuwo munnuupuwela mwaha-ene. Nto okathi owo... Miyo kaahiihaniwa okhumela ota. Amwaar'aka, amaathi ni miyo, naahirowa. Owo aamuthenle mwali mmosa aari murokora, kookupali, a George Cupp, aari mukhulupale a mpooma, ahiiso mphuki nno. Awawe... Owo aari mulamu awe. Awo yaamuruuhale nno wira akhwe. Meetiku oMilltown, meetiku oNew Albany, aaroomwaleyaya erett'awe ntoko kankuru a hapa. Vano miyo khurowa omoona Muhano Hall. Ni owo aarina ettekuxa ya wamwe a ncano, nto aari a ncano erutthu yothene. Nto miyo khwira, "Ahe, kinoona wira onrowa okhwa." Nto miyo khwira...

¹¹⁰ Owo khwira, "Munna Bill, yookhala enamuna emosa yo... Munniwerya wiiwa yookhuma wa Muluku?"

Miyo khwira, "Nki-nkisuwenle, Munna Hall. Kinoowerya ovekela."

¹¹¹ Miyo khuvekela. Vano miyo khutthikela owaani, nto Apwiya khuhikihimeerya hat'etthu. Vano miyo khutthika, mmeeloni mwaya, kaahivekela-tho.

Nto owo khwira, “Munnimusuwela meetiku oosuwelexa?”

¹¹² Miyo khwira, “Ahe, meetiku ahu a mw’emusini ti Dr. Sam Adair, ohitto nno oJeffersonville. Owo—owo—owo ti. . . Atithi awe yaari meetiku a mw’emusini mwahu. Mmiravo Sam ni miyo kweekwe n’apatthani a vatthirima, nto—nto naavolonwe oxikola okathi mmosa, naaleliwe vamosa. Kweekwe ninrowaka wa yoowo yakhala—ru etthu evonyeiyē.”

Owo khwira, “Kiireke aamuwerya orwa ommwaleya Bill Hall?” aiy’awe.

Miyo khwira, “Kinonvekela.”

¹¹³ Ahe, Sam khukileela, owo khwira, “Billy, vakhala wira meetiku ohimmye wira orina kankuru,” khwira, “enikihalela etthu emosa paahi, ya miyo wira, kinonvahererya mutthu ori oosuwelexa okivikana miyo, muratti mmosa. Nto ninoowiira arayu xiixi; ni khaninrowa onviriha—tho mohaaxani.”

¹¹⁴ Hiyo khimuroiha oNew Albany khuwaakhela arayu xiixi a meetiku weiwe. Khimuroiha oLouisville khummwaleya, khukuxiwa mw’ampulansiya, khimuhokoloxa.

¹¹⁵ Ahe, tthiri, owo khaarowa omuleela Muhano Hall exeeni yaari mukattyamiho awe, tivo owo aakiihann’awe. Owo khwira, “Onoorowa okhwa,” khwira, “mpatthan’inyu mulaleyi.” Khwira, “Muratti oLouisville onoomalaru okiihana, nto khwira, ‘Sookhumela mameetiku ahimaly’aya o—o. . . oMilltown wu; ni meetiku, New Albany; ahimanse sookhumela soolikana.” Nto khwira, “Owo kankuru a hapa, ni khoreere otepa. Nto, Billy, khanikhanle omuthikilaka hapa a mulopwan’owo, nto khukhala mukumi.” Khwira, “Owo onoorowa okhwa. Nto vakhala wira mulaleyii, ohaana okhala oolikana.”

¹¹⁶ Miyo khwira, “Owo kuhiyo ti mwaha—ene. Masi owo khorina miyaakha soovikana miloko mithanu ni mithanu, tivo owo khoreerane ekumi mwa yoowo nlelo, wira alaleye.” Nto miyo khwira, “Ahe, vakhala wira onrowa okhwa, eyo ennimaliha mwaha weso. Kooxukhuru, Dr. Sam.”

¹¹⁷ Vano miyo khurowa khumwiihana Muhano Hall vate, khimuhimeerya. Miyo khwira, “Muhano Hall, Sam ohimmye wira sookhumela s’oLouisville imosaru ntoko oNew Albany ni Milltown. Mulopwan’owo onimookhwa. Munna Hall onoorowa okhwa. Ni owo orina kankuru a hapa, ni khoreere otepa.”

¹¹⁸ Vano nto owo khupacerya wunla. Miyo khurukunuwa, khuvekela ni yoowo. Vano owo khaisuwela, nto, mpakha vahaasuwel’awe wira kaari musaala.

¹¹⁹ Vano, miyo khuhokolowa. Ni atthu anci—ene yaanirwa owaani, mahiku awo. Khaakhanle hata mutthu mukina vapuwani w’olaleerya. Khiwaari woohononeya n’itthu sinci—ene, vano atthu yaanirwa ekhumaka mapuro othene.

120 Miyo kaanithhuna omumula vakhani. Vano miyo khuvolowa kiitaka, khuvanya oxaaka, ntoko iwoora piili ni minuutu miloko miraru, wala iwoora tthaaru. Munna Wood khaathaamenle muttetthe nlelo. Vano miyo khuwehaweha vanvoloiwa, nto khaakhanle, hata mutthu vate vale, vano miyo khukuxa exapheyo aka ya khalayi khuvolowa vakhani-vakhani mustuutiyo, khimukuxa kapwitthi aka a .22. Nto kaarowa okhuma kaxaye ikhopa, mpakha ophiya iwoora thanu na tthaaru, vano nto kaarowa ophiteerya mwiri nipuro nlo kirupe vakhani. Khimwaakhanle wira owaani.

121 Khukuxa exapheyo aka khuvira musaala. Yaahikhala masa yaathomeiwe vaxirini. Nto yaari ma—masa ooropa saana. Yaarookhuuriwa n'axitthu, yaari a ithukurumwe, ni yaari othene a malepa. Nto miyo khuupuwela, “Meda othomeiye mwaha wa xeeni vaxirini vale?”

122 Vano miyo khuweha, emaara ekina, vano khayaari vaxirini. Yaathomeiwe osulu. Vano miyo khurula exapheyo aka naanaanoru, khumpweha kapwitthi vanloothoni, khukokhora. Miyo khwira, “Pwiya, xeeni entthun'anyu omusuweliha murumeyi anyu?”

123 Khurwa makina, khurwa makina, mpakha oophiyaka masa maxexe wala mathanu (kinooliyala vano yaari makavi) yaathomeiwe vale. Vano nto masa maalupale, ooreera, a malepa; masa maalupale pahi, owooneya ntoko eekumi, khukhuruwa khukhuura masa ale makina yaakhala ntoko itathela. Nto Awo khwira, “Nvenye. Mweemele.” Khwira, “Mwamuhimeerye Bill Hall, wira khonrowa okhwa. Onoorowa okhala mukumi.”

124 Oh, kaahitthyawa vowaakuva ntoko saawery'aka, nto miyo khwira, “Muhano Hall, kihaana SIISO ANIHIMYA T'APWIYA. Owo onoorowa okhala mukumi.” Ni owo aahikiiwa. Nto aaphavela wunla, ni khaawerya-tho olavula.

125 Miyo khutthika khumwiihana Sam. Nto miyo khwira, “Sam, mu—munn'ihu onoorowa okhala mukumi.”

Owo khwira, “Vanweryaneya sayi okhala mukumi siisaale?”

126 Miyo khwira, “Owo kuhiyo mwah'aka. Muluku ohimnye siiso. Eyo ennimaliha mwaha.”

127 Owo mukumii olelo. Soovira miyaakha soophiyaka muloko. Oolipa ni mukumi. Amwaar'awe ahookhwa okhuma vaavo. Owo oothela-tho.

128 Enrowa wiiraneya sayi wa George Wright, ni anci-ene akina naakhanly'ahu waahimiyaka, naakhanly'ahu waaromolaka? Exeeni iyo? Iwo ovilela oveehiwa. Awo anootheya n'uveeha.

129 Kinnuupuwela ohinatthi osareya wa maasi wa 37. Miyo kaari iwe ni Mwaalaano wa Othaama w'oFalls City, nto kaamwaaleela wira, yaamurowa okhala maasi imeeturu thanu na xexe ni nuusu, kookupali wira yaari yeeyo, Ephiro Spring.

Awo khukitheya. Awo khwira, “Billy oohaawa. Kionoona wira owo. . . Mwanamwane owo!” Kaari mmiravo paahi okathi uwo. Owo khwira, “Billy mwanamwane mmosa ooreera murima. Ti yo wooniha othunku owo okhalaka ootikinihiwa.” Miyo nkaari ootikinihiwa. Kaarookela oopatisiwa *muhina*, nkaari ootikinihiwa. Miyo tu kaari “muhina.” Nto yiiraneieye siiso paahi.

¹³⁰ Okathi kiir’aka kilavulaka, kaahinweha Munna Hattie Wright muthiyana, kookupali, okilante ottuli iwe. Owo onnuupuwela mwah’owo wa Bill Hall. Anci-ene. Akavi ari mu, akhanle voosiis’ula, anuupuwela mwaha-ene? Oh, wulu! Vekeekhai. Aakhala anci-ene a nyuwo.

¹³¹ Vano, awo anninoonela othunku, annimoonela othunku khula mutthu omphavela ovarelela Masu, mahiku a anamanyemula. Masi, muupuwele, oveehiwa ohaana orwa. Kweekwe enkhalaka siiso. Awo yaahaana wira yuupuwenle-ene, ntoko siiraly’aya okathi ule, wira Muluku, vaamanly’aya khula etthu wooniheriwa ni siyensiya, wira Muluku khaarowa olavula hat’etthu yaari yonvirikanya siyensiya. Ahe, ti yeeyo enimukhaliha Owo Muluku. Vaakhanle wira Owo aamuttharinhe siyensiya paahi, weso khiyaarowa-tho okhala ovikana ele mutthu aawery’awe opaka. Masi, Owo Mulukuu. Owo ti—Owo ti Mpattuxa a siyensiya. Owo onniwerya wira etthu ontthun’awe.

¹³² Awo yaahaana wira yuupuwenle, “Nowe mulweene oohaawa, ahe, mmuhiye mulweene owo mmansawe. Owo onooyeleela othweela wothene ninkhalan’ahu mahiku ala, tivo mmuhiye paahi mmansawe.” Eri ntoko siiso olelo.

¹³³ Masi, vano, kintthuna kihimye etthu ekina vaava va. Vano, hiyo ninniweha ottuli n’uthamala waamini wawe. Masi kinniikoha, vaakhanle wira hiyo naakhanle mahiku ale, naamwiira nikunxe-ene mweemereryo mmosaru Nowe aakuxaly’awe? Naamuwerya ni otthuna ovilela oveehiwa waarowa ni Ekeekhai? Okathi, imilyawu sothene s’atthu yaari molumwenkuni okathi ule, aari Nowe paahi n’amusi awe yeemerernye Ekeekhai ile. Muhuupuwela eyo? Mulopwan’ole paahi ni an’awe axilopwana araru, ni aximaathi awe, amwaar’awe, yaari yaawo paahi yeemerernye Ekeekhai. Masi awo yaahikhalanasa SIISO ANIHIMYA T’APWIYA. Hiyo ninniweha ottuli n’umuthamala. Naamuwerya wuupuwela-tho yeeyo?

Kihaana waakuva mwaha wa soovaha s’anamwane ala.

¹³⁴ Abrahamu, nuulumo nene *Abrahamu* nnihimya “tiithi a anci-ene,” omukhaliha “tiithi a maloko.”

¹³⁵ Vano, Abrahamu aahiiwa Masu a Muluku. Abrahamu aari profeta, ni owo aahiiwa Masu a Muluku. Ni hiyo ninnimuthamala Abrahamu mwaha wo ovarelela wawe Masu

a Muluku; moota owo aavalann'awe n'axitiithi awe; moota yaary'aya yoolipa w'Abrahamu. Owo aaleliwe iwe. Aakhumme oBabeli, ni—ni aari wu elapo y'oXineyari ni a—a—aKhalteya, muttetthe w'oUri, weiwo axirikh'awe othene, atthu awe, n'ale aarowan'awe okereja, ni sothene. Masi Muluku iirale, “Mwiivalaanihe.” Oh, wulu! Etthu xeeni yootakhalexa yaari ile, waahiya atthu othene owo aaphent'awe, sothene saari s'ekeekhai wa yoowo, owo aaphent'awe. Nto Muluku khumwiirela, “Mwiivalaanihe.”

136 Nto khunvaha etthu emosa yootikiniha saana. “Munrowa okhalana mwaana n'amwar'inyu.” Vano owo aarina miyaakha miloko mithanu na miili ni mithanu. Waahimala okhala n'uwo ntoko muthiyana, ntoko elimalelo y'athiyana yaarowa omuyara mwaana, mwa miyaakha. Nto va, vaamanly'awe okhala n'uwo okhuma okathi aary'awe mwali, okhala wira aari murokor'awe nuusu, vano nto aawerya sayi owo omuyara mwaan'owo? Nto vano mwaamuwerya omuthokelela Abrahamu akhumaka eriyari y'axirikh'awe, ni airaka, “Ninrowa okhalana mwaana, Sara ni miyo”? Mwaamuwerya otthokelela yeeyo?

137 Vano, atthu yiirale, “Mulweene ole oohaawa, yookhala etthu ehilonke n'uwo.”

138 Iwo oveehiwa, masi Abrahamu aahivarelela. Nto okathi waarin'awe miyaakha emiya, owo khaamuhovenrye natiri a Muluku. Owo nlelo aaheemererya oveehiwa, vekeekhai, avarelelaka yeeyo.

139 Mooweha evirikanelo vo? Sara aaheererya onvaha Abrahamu, ahiiso onvaha Muluku, kiireke, mukhaliheryo mwaamukhaani, mmansawe. Owo aahuupuwela, moosuwela, wira, woovirikana vakhani n'ile Muluku aahimaly'awe. “Vano, moosuwela, miyo ka muthiyana owuuluvala, masi Hakari va muthiyana ooreera. Abrahamu khenrowa omunanara omuthela yoola, nave. Vano, moosuwela, eyo—eyo enoomukhaliherya Muluku. Eyo enoomukhaliherya Muluku, okhala wira Hakari, va, owo khino orina miyaakha miloko miili. Owo namuteko aka. Nto moosuwela enrow'aka wira? Kinonvaha aiy'aka, ntoko mwaara,” okhala wira waatteya waari w'otthariha malamulo. Nto owo khwira. . . “Kinonvaha, nto owo onookhalana mwaana n'aiy'aka, vano nto kinoomukuxa mwaana ene. Nto owo onookhala ole Muluku omulaihenry'awe.”

140 Moone, hiyo kweekwe nineererya wira etthu; khaninwerya onwehererya Owo. Nihaana wira etthu, mmansihu. Khino yaari yoolikana. Owo khino aari ooreera. Pooti yaari ntoko yooreera, masi khayaari ntoko Masu. Muluku aamuhimenrye Abrahamu wira mwaana aarowa orwa mwa Sara.

141 Munnuupuwela etthu Owo ohimaly'awe mwaha wa Nikoto naamukhaani? “Ithoonyeryo iya sinimwaatthara ale anrowa waamini.” “Ntoko saary'aya mahiku a Nowe, siiso-tho

enookhala orwa wa Mwaana a mutthu, vaavo vakhani, athu athanu n'araru, yooponw'aya." Masu awo khakhanle ovonyaka, tivo nrowe niwehe mmansihu oratteene ni nikhale ni Masu. Vaareera. Munnona?

¹⁴² Athu kweekwe aneererya opaka etthu, wira ekhale opuro wa otthuna w'opattuxa wa Muluku. Moone, ntoko sinihimyak'aka, ni khino ohoolo w'ekereja, ohoolo, moosuwela, khimwaakhanle wiirelaka epwittipwitthi, "Munoowerya okipakela manri kamosa-kamosa?" Nnari, eyo khekhanle wiiraka eyo. Vano, epuri khenwerya opaka manri, okhala wira mukhalelo aya khunrowa otthuniherya. Khivancala mootaxeeni muneerery'anyu otthukelela manri a epwittipwitthi v'epurini, khenvara etthu. Epuri khenwerya opaka manri, ni epwittipwitthi khempaka maihi. Masi eyo erina manri okhala wira epwittipwitthii. Ti yeeyo enikhaliha. Eyo khempaka.

¹⁴³ Khivantthuneya hiyo opaka mihokorokho sa Eroho. Vantthuneya hiyo wiima muhokorokho wa Eroho. Mwiri wa masa khompaka masa; owo onimwiima tu okhala wira mwiri wa masa.

¹⁴⁴ Nto hiyo neererya opaka etthu p'itthu, "Miyo kinookhaliherya Mwaha ene. Kinoosoma miyaakha muloko oseminariyu. Kinooxutta *ela, ele*, wala *ekina*, kikkhalane ikharawu saka sa Paxareli ni Totori. Kinimwaakhaliherya Apwiya, meekh'aka." Khenvara etthu.

¹⁴⁵ Muluku, mwa otthoma, onimwiihana ole Owo ommutthun'awe. Owo oninvaha Omwene khula mutthu Owo onttun'awe onvaha. Hiyo nooxutta eyo ni Napukutonosoori.

¹⁴⁶ Hiyo nooxutta eyo ni—ni Yeremiya, okathi Muluku aamuhimenry'awe ni Masu a Apwiya, wira waamurowa okhala okathi Isarayeli aarow'awe okuxiwa mw'epothani arowaniwaka oPapilooniya mwa miyaakha miloko mithanu na miili. Va khurwa profeta mukina. Owo iira amuhimenry'ene, wira, "Vano, munookhalana maprofeta, anrowa okhumelela. Nto munookhalana iwe oPapilooniya, anrowa okhumelela, ni anamaloha ni maprofeta, anrowa olaleeryaka voovirikana n'Ila. Masi mwaalelele atthu wira ehiwiiwelele atthu awo."

¹⁴⁷ Nto aahikhumela mutthu nsina nawe—aari, mmosa a maprofeta, Ananiya. Nto okathi Yeremiya eemenly'awe vale ni ephatta muxikoni mwawe, vale aarwiiye ti Ananiya, khwira, "SIISO ANIHIMYA T'APWIYA, numala miyaakha miili, miyaapu sothene s'Apwiya. . ." Vano, voophaveleya, yaakhala ntoko yooreera saana. "Muluku onoorowa waareeriha atthu Awe. Owo onoorowa ohokoloxa itthu sothene oratteene, mwa miyaakha miili."

¹⁴⁸ Ni Bibilia ohimnye wira, hata profeta Yeremiya iirale, "Amen. Amen. Ananiya, Apwiya ekhumelelihe moolumo anyu. Masi nrowe nuupuwele etthu, Ananiya. Yaahikhala

maprofeta hiyo nihinatthi, n'awo yaahilaleeryasa evirikanyaka ilapo suulupale sa ekhotto, ni sikina. Masi, muupuwele, profeta onsuweliwa vammal'aya wooniheriwa yoolaleery'awe." Munnona?

¹⁴⁹ Vano Ananiya khurwa, khukumiha ephatta muxikoni mwa Yeremiya, ohoolo w'anamukuttho othene ni muthukumano, khino atthu emilyawu emosa ni nuusu. Khukuxa ephatta ele Muluku aahenly'awe muxikoni mwa Yeremiya, ntoko ekanyeryo, khuntakasa kapatti-kapatti, khurihela munawoni mw'awe, wuukhuwa paahi, nto khwira, "SIISO ANIHIMYA T'APWIYA, mwa miyaakha miili, awo anoohokolowa."

¹⁵⁰ Yeremiya khunweha paahi. Yaari yoovirikana ni Masu, tivo owo khurwa paahi. Nto Muluku khwira, "Mutthike mwamuhimeerye," khwira, "Miyo nkinatoko olavula n'uwo."

¹⁵¹ Owo aarimuukhuwa paahi. Owo aattharinhe moonelo awe. Munnona? Owo khaalipelenle mpakha vekeekhai woona eyo ni osuwela wira owo, wira aari Muluku aahimye. Owo khutthika, oowuukhuwa saana. Vakhala . . .

¹⁵² Hiyo ninniphwanya eyo, mulaponi, olelo. Emosa wa ifiita sahu yaamurumihiwa mahiku avinre etthoko emosa, vaavo nikhuru n'arumeyi yaakhanly'aya ookupali naanaanoru, nto yaamoorwasa wira epatisiwe ni Nsina na Yesu Kristu. Vano mulopwana mmosa khuyenya musaala, aalavunle ilavulelo khwira, "SIISO ANIHIMYA T'APWIYA. Mukhale ni yeeyo murin'anyu. Mukeleleke ohoolo paahi, murowaka, nto Miyo kinimooreerihani."

¹⁵³ Awo khwira, "Ahe, vakhala wira Apwiya aahimya eyo, kinoona wira ti yeeyo." Moone, eyo kheniwewehewehiwa ni Masu. Ehaana okuxa Masu, toko. Eyo vo. Yaari yoovirikana ni Masu.

¹⁵⁴ Va khurwa Yeremiya, profet'ole oottikittheliwa. Muluku aahimuhimeerya, khwira, "Miyo koosuwela wira Ananiya ohinta ephatta ya mwiri muxikoni mw'anyu, kaahenly'aka, masi kinrowa opaka ekina ya yuuma." Owo khwira, "Ni ilapo sothene iya sironwe omurumeela Napukutonosoori, murumeyi Aka," nave owo aari pakawu. Munnona? Nto Isarayeli, yaattharihela mikuttho saya sothene, masi awo khayaari. . . Munnona?

¹⁵⁵ Muluku aahinvaha natiri, wira Owo aamureeriha, masi mareeriho awo anthariha sootthuneya. Ni nyuwo muhaana otthariha sootthuneya iyo, wira eyo evare muteko.

¹⁵⁶ Kikilanthe-ene, okathi vakhani, ni mwaaruusi mmosa, ooreera va. Yoopacerya, kaahithokosa emusi iyo, wira koone sinto yaahikhala etthu p'itthu yaavonyeiye. Muluku onoovoniha, masi enttharihela sootthuneya. Munnona? Etthu emosa paahi kaaphwannye aka, yaari, mai oowoova, wira yaari yoovonyeya owurya murette. Miyo khwira, "Muhuupuweleke yeeyo, munna. Mukumihe yeeyo mmuruni mw'anyu. Rowakani ni mwaana. Munvahe murette. Muluku onoosuweliha eyo." Munnona?

157 Vano, masi, etthu ene t'ila, mphwanye, musuwele. Vano nto, vakhala wira ti SIISO ANIHIMYA T'APWIYA, ti vooreera.

158 Vano hiyo ninniphwanya va wira, atthu ala, awo yeererya opaka etthu; Hakari ni—ni Sara, wira emukhaliherye Abrahamu, omukhaliherya Muluku wira natiri Awe omaliheriwe. Khamunwerya wira eyo. Khiivo hata enamuna, nnakhala, yo wira eyo. Ti—ti yoovirikanya sothene. Masu a Muluku animwiiraneya, khula enamuna. Nyuwo muhaana paahi okhala oratteene mwa Masu, ni wira, “Ti enamuna *ela*,” ni wiiwelela Masu. Vano, nwehe, opaka etthu wira ekhale opuro wa Masu Awe!

159 Khino apatthani awe Abrahamu, nave, naphiyerya oweha, khino apatthani awe Abrahamu yaahivira khwira, “Ahe, tiithi a maloko, aana akavi murin’anyu vano?” Okathi waarin’awe miyaakha emiya. “Khwira, tiithi a maloko, tiithi a anci-ene, aana akavi murin’anyu vano?” Anamanyemula!

160 Vano, khamunoonaka okathi? Khaninoonaka eyo, okathi imaara sikina ninvekel’ahu mwaha w’etthu, eyo khuhiiraneya?

161 “Va omphwanyaneya mulopwana mmosa mulweene,” awo annihimya. “Owo khonoona. Owo khoniiwa. Owo khonlavula. Owo muretta. Owo ohiira *ela*. Murowe iwe mwanvonihe, nyuwo a mpenuxa a eMuluku. Hiyo nnimwaamini.”

162 Awo annisuwela wira owo ti xetwani yoole mmosaru iirale, “Mukhuruwe vamwiikimanyo, nto kinoowaaminini. Mutatuxe maluku ala ekhale yolya, nto kinimwaamini?” Munnona? Xetwani yoole mmosaru aatthukenle nttapwatta mmaithoni wa Pwiy’ahu, khummana vamuru ni mwiri, khwira, “Vano, Nyuwo mwaari profeta, munleele oomanne, vano ninoowaamini.”

163 Ahe, moosuwela wira Owo aahisuwela t’ani yammanne. Owo aaniwerya otatuxa maluku ale khukhala yolya. Wala, Owo aaniwerya okhuruwa vamwiikimanyo. Masi hiyo naarowa okhala exeeni olelo vaakhanle wira Owo aahikhuruwa? Munnona? Awo khansuwela etthokiheryo ya Muluku. Muhaana osuwela etthu Muluku olaihenry’awe.

Vano kihaana waakuva.

164 Vano, vano awo pooti yiirale, “Tiithi a maloko, hiyo noowiiwani, miyaakha miloko miili ni mithanu sivinre, ohimya wira mwaarowa okhalana mwaana ni Saara, ni wira mwa yoowo yaamukhumelela maloko a atthu. Aana akavi murin’anyu vano, tiithi a maloko?” Ha! Munnona? Eyo erooho emosaru yeeyo yo wuulumela enuulumela.

165 Abrahamu iirale exeeni? Khwira, “Owo khaamuhovenrye natiri, mwaha wo ohaamini.”

“Vano, va monvekelela *Lexe ni lexe*, vano awo khapenuwanse.”

166 Eyo khencala. Hata kaavekelela aththu ikonto muloko ohiy'ula, vano ikonto muloko khukhwa voosiisu, meelo ohiyu nlelo kinimwaattikitthela makhura aretta kaavekelele. Muluku ohimye siiso. Eyo khenkhottiha, hata vakhani. Muluku oolaiherya. Miyo kinnaamini. Vekeekhai. Khivanvirikana hata vakhani etthu awo anihimy'aya. Masi, awo anoonyemula. Iwo p'veeehiwa wa Masu.

167 Abrahamu, eemereryaka Masu a Muluku, vookiserya Awo yaahimaliheriwa. Oh, wulu!

168 Nkawehani onyemuliwa mwaha w'ohiyara. Anyemuliwaka, ni oveehiwa mwaha w'ohiyara, toko. Awo yaahikhalana. . . Owo aahaana ovilela oveehiwa mwaha w'okhala oohiyara miyaakha sothene iye. Owo aahanle ophiya miyaakha emiya. Owo aarina miloko mithanu na mixexe, ni Masu a Muluku yaahimye wira owo aarowa okhala *muhano*, mai a mwaan'ola. Vano owo ni Abrahamu, oohiyarasa, iru—irutthu saya ntoko sookhwa, masi nnakhala vo awo khayaahoveryanse Masu, hata vakhani. Masi awo yaahaana ovilelasa yeeyo, toko. Vano nto, aleluya, Muluku aahimaliherya Masu Awe, okathi ule wooriipela: Isakhi aahiyariwa. "Vano osuulu awe ori ntoko mihaava sa mphareya wala itheneeri sa Wirimu." Munnona? Muluku okathi wothene onnaakhula Masu Awe. Ayo. Ohiyara toko, vano Isakhi.

169 Zakariya ni Elisapeeti, voolikana, mulopwan'ole mutokweene ni muthiyana mutokweene, nlelo evarelasaka. Nto okathi Zakariya ophiyal'awe vale, ni khuwerya olepa v'artoosiyani vawe, nto khwira, "Nlaikha naahikirweela, khukileela wira kinoomuyara mwaana ni Elisapeeti, amwaar'aka owuuluvala va. Nkinwerya-tho olavula. Nkinuuluma. Nkinrowa wuuluma mpakha nihiku nin'yariwaawe mwaana. Masi onnoorwa mwaana, nto owo onrowa okhala profeta a ole a Wirimu-rimu. Owo onimooniherya Ettheneeri Y'oxaka. Owo t'onimuholela Mesiya." Vaaweryaneya sayi?

170 Amosa-amosa yiirale, "Mulweene oohaawa. Oh, ki—kinoona wira owo oovahuwa vakhani, moosuwela. Yookhala etthu yaamukhaani. Masi nkanweheni Elisapeeti ula mutokweene iwe, oophiyaka miyaakha miloko mithanu na miraru. Ni nkanweheni—nkanweheni—nkanweheni Zakariya, owuuluvala ni oothukumelasa, vano nto onoohimya etthu ntoko eyo. Ahe, mutokweene oohaawa."

171 Masi owo aahikhalana Masu a Apwiya. Oveehiwa xeeni, mpakha owo wiisiipitiha mahiku manci-ene. Masi owo aahikhala ni Masu. Oh, wulu!

172 Akhoottaka osuweliwa, akhoottaka eyuupuwelelo y'atthu, aahikhootta erattelo ya nihiku nle, ni inamuna n'itthu sa nihiku naya. Awo yaahikhoottasa. Awo yaahikhoottasa weetta ni muttitthi w'alipa-oohaamini. Awo yaahikhoottasa itthu sa

molumwenkuni. Awo yaahaana wira, wira ekhale ni Masu a Muluku. Awo yaahaana wira.

¹⁷³ Ti siiso ery'aya olelo. Mwiivalaanihe itthu sothene woohikhala nyuwo ni Muluku. Kehiyo ele ekereja enir'aya. T'ile nyuwo muniir'anyu ni Muluku. Munnona? Ti nyuwo, ntoko mutthu. Ayo.

¹⁷⁴ Masi nkawehani etthu Muluku aamuvahaly'awe. Okathi Yesu Mwaneene orwiiy'awe, Zakariya aahivira etuniya, Elisapeeti, nave. Masi okathi mwan'aya orwiiy'awe mothakoni, ni SISO ANIHIMYA T'APWIYA, Yesu iirale, "Khaakhanle hata mutthu oyariwe ni muthiyana muulupale ntoko owo." Amen. Exeeni? Owo aahiphwanya oveehiwa wa ohiyara. Owo aahikhala mwa Masu, vano khimuyara mwaan'owo.

¹⁷⁵ Ntoko Saara a khalayi, ntoko Abrahamu a khalayi, anaithoko atokweene yaahivarelela yeeyo. Nkawehani, ancienne atonko oyariwa, "ntoko mihaava sa mphareya," khanivo hata nloko n'atthu molumwenkuni noowaatta ntoko aYuta. "Ntoko mihaava sa mphareya wala ittheneeri sa wirimu." Exeeni yaakhumelenle? Yaakhumelenle mw'ale vakhani, mwaana mmosa.

¹⁷⁶ Vano munnoona onrow'aka-wo. Mwaana mmosa, yaari yothene yaatthunaneieye. Aatthunaneieye mwaana mmosa wira attikinye maloko ni amuthoonye Mesiya. Aatthunaneieye mmosa, oowiwelela. Ti yeeyo. Muluku ommutthuna mutthu mmosa paahi. Ti yothene Owo ontthun'awe, nipuro nimosa Owo okhanly'awe okhalanaka nsu. Eyo ti yothene Owo ontthun'awe, omphwanya mutthu mmosa vathi va mweettiheryo Awe. Oh, moota Owo onimusivel'awe omukuxa mutthu mmosa!

¹⁷⁷ Owo aahikhalana Nowe mmosa, emaara emosa. Owo aahikhalana mmo—Owo aahikhalana Moise mmosa, emaara emosa. Owo aahikhalana mmo—Yeremiya mmosa. Owo aahikhalana mmo—Eliya mmosa. Owo aahikhalana Elisewu mmosa. Owo aahikhalana Yohani mmosa. Owo—Owo onnikhalana . . . Owo aahikhalana Sansoni mmosa. Owo aweryaru okhalana mutthu mmosa vathi va mweettiheryo Awe, nlo ti Nsu Nawe. Owo onoowerya olavula mwa nenlo. Owo onoohukumu olumwenku. Oh, wulu!

¹⁷⁸ Moota Owo onivoliw'awe etala ni owehererya, okhalana mutthu vathi va mweettiheryo Awe, "Yoowo Miyo okhanly'aka olavula mwa yoowo. Kikhanly'aka osuweliha Nsu Naka. Hata owo aveehiwaka, masi Miyo kinoosuweliha Nsu Naka." Munnona? Oh, ayo.

¹⁷⁹ Ohiyara, toko. Owo aahaana ovilela, aahaana weemererya oveehiwa wa ohiyara. Sara aahaana ovilela. Siiso Zakariya ni Elisapeeti yaahaana ovilela.

¹⁸⁰ Nkawehani, olelo. Vano kinrowa ohimya etthu. Nkaawehaseni olelo aana a namuttompe. Owo ookuxa

maloko othene vathi va erumelo ya poliitika ya muromolelo, namuttompe ni an'awe axithiyana. Nkawehani nloko na miromolelo nikhumelenle, ni moota anaxariya aris'aya vakhani. Muhivela-vele. Mukhale ni Masu. Sothene siri saana.

¹⁸¹ Khino nyuwo pooti onyemuliwa, wiihaniwa santu oophirikeya. Nyuwo pooti wiihaniwa sothene, ni khula enamuna ya nsina noonanara. Masi, mukhale vaavo, Awo Masuu, oveehiwa wa Masu, etthu awo anrow'aya woohimyanani.

¹⁸² Mmiravo mmosa, pooti okhanle-ene vaava voosiis'ula. Owo mpatthani aka; Jim Poole, mmiravo Jim, awawe—atthu awe. Owo aahikohiwa nihiku nlo. Ahe, owo opatisiwe vaava. Ookhala aamuhimenrye, khwira, “Vakhala wira mwaarowa opatisiwa ekereja emosa, xeeni ohithanla ekereja yuulupale, etthu?” Munnona? Masi owo onne Waarya. Yaari yeeyo. Munnona?

¹⁸³ “Owaatta t'ana a atakhali waavikana ale a anaxariya.” Ayo. Vaareera. Moota ary'aya vakhani, ale a anaxariya! Nkawehani nikhuru nikhaani yaakhanle mahiku a Nowe. Munnona? Nkawehani ale yaari mahiku a oSotoma. Munnona? Moota akhanly'aya vakhani anaxariya!

¹⁸⁴ Aana akavi namuttompe orin'awe! Owo onaayara aana paahi khula enamuna, masi awo othene aana ooraruwa. Namuttompe onimuyara namuttompe. Mwalapwa onimuyara mwalapwa.

¹⁸⁵ Nto Kristu onimuyara ole oottikittheliwa. Bibilia onaayara anaxariya, tivo hiyo nihaana weemererya muupuwelo wira niri nikhuru nikhaani. Etthu xeeni ya mahala ekhanly'aya yeeyo!

¹⁸⁶ Nkawehani ekereja yuulupale y'oWefeso, yaari muloko n'anli paahi mmo. Ayo. Nkawehani nikhuru xeeni hiyo nrin'ahu olelo, naalikanihaka n'awo. Ayo.

Yaari atthu athanu n'araru paahi mahiku a Nowe.

¹⁸⁷ Yaari athanu paahi mahiku a Lothi, nnari, axexe; Lothi n'amwaar'awe, ni an'awe anli athiyana. Vano awo khuthatuwa nripu na maluku vaamanly'aya okhuma, mwaha wo oweha ottuli. Vekeekhai, araru ti yaakhumme nihiku nle.

¹⁸⁸ Vano Yesu ohimye wira, “Ntoko saary'aya mahiku ale.” Vanninitthuna owehaweha ni okasoopa. Moota ary'aya vakhani anaxariya! Masi, ntoko kweekwe, anamanyemula ahaana oveeha. Ohiya-. . . Ovilela oveehiwa wo ohiyara, toko. Wulu!

¹⁸⁹ Kihaana waakuva. Miyo ka. . . Miyo nki. . . Kintthuna kikhaliherye waaphiyerya anamwane ala. Nvilele ni miyo vakhani paahi. Munnona?

¹⁹⁰ Atthu ari kweekwe ntoko sinkhalak'aya. Vano kinrowa ohimya-tho etthu. Ni kintthuna wira nyuwo. . . Ni nkisuwenle sinto enookaravariwa, wala nnari. Masi yaakhanle-ene mufiitani, kintthuna mukiwiriyanane, nyuwo muniwa efiita. Muhihaleele, masi musome. Mutthu olelo ori ntoko

sinkhalak'awe kweekwe. Owo oninvuwiha Muluku mwaha w'etthu Owo iiraly'awe; awehereryaka etthu Owo onrow'awe wira ohoolo; nave ahisuwelaka etthu Owo iiraly'awe ni oniir'awe. Owo oninvuwiha Muluku mwaha w'etthu Owo iiraly'awe; onwehererya etthu owo onrow'awe wira ohoolo; masi khonsuwela etthu Muluku oniir'awe, nto vaavo owo onoohaleela etthu yothene. Kinroromela wira anoovara saana eyo. Munnona? Ohisuwelaka etthu Owo oniir'awe! Owo onnisuwela etthu Owo iiraly'awe; ni onnimusuwela natiri etthu Owo onrow'awe wira; masi onnivonya woona etthu Owo oniir'awe.

¹⁹¹ Oh, nyuwo aPentekosite, vakhala wira khamuhiyo ethoonyeryo ya yeeyo! Munwehererya etthu wira yiiraneye ohoolo: ntoko kweekwe, ekhumelenle ohoolo wanyu, nave khamunsuwela. "Imaara kavi Owo otthunn'awe woophuramwelani, ntoko mwalyakhu ni axaan'awe, masi nyuwo khuhitthuna." Soosivelanxeni ilimalelo sanyu ni miromolelo sanyu ovikana Masu Awe ni Eroho Awe. Ayo.

¹⁹² Oveehiwa xeeni wa Maria! (Nimalihaka.) Oveehiwa xeeni wa Maria ni Yosefe, mwaha wa Masu Awe! Ola okathi wa Natale. Kuupuwelela osuka vakhani paahi, masi nyuwo muhiwa yeeyo vanci-ene muraatiyuni ni eriyari ya mapastore, n'akina. Oveehiwa xeeni wa Maria ni Yosefe, mwaha w'ovarelela Masu a Muluku a natiri! Muupuwele, vano. Ni othanyiwa, makhwikwi ale oovenxiwa, okathi waamoonaly'aya Maria mwaamukhaani aviraka, emoonaka Yosefe. "Munrowa omuthela namuttompe." Munnona? Ni muupuwele, munna, oraruwa waakhala okhwa mahiku ale. "Vano, nyuwo munoomukhottiherya wiiwiwa. Owo onrowa okhala maama mwaha wa nyuwo." Nto, masi, muupuwele, okathi wothene, Muluku eetta ni yaawo, ni yaari voothariha Masu. Vano atthu khayaasuwela eyo. Munnona?

¹⁹³ "Mwali harusi onoomuyara mwaana." Yosefe aanisuwela eyo. Maria aanisuwela eyo, okhala wira, numala olempha Masu, naahikhala Nlaikha naalavula ni yaawo, nilipiheryaka, ahiiso nooniheryaka Masu yaawo yaalempwe, wira yaamurowa wiiraneya. Muhilohe vano. Muupuwele. Eroho Yowarya yaahikhuruwela elapo ya vathi; khiyaalavunle ni muthukumano wothene. Eyo yaalavunle n'awo.

¹⁹⁴ Yosefe aahiweha. Nto Nlaikha nihinatthi omuthotola, owo iirale, "Ahe, vano, miyo kinnimphenta. Masi, ka mutthu naxariya. Nkikhanle omuthelaka muthiyana ntoko ole."

¹⁹⁵ Vano Nlaikha n'Apwiya naahimukhumelela, moolohani, khwira, "Yosefe, mwaana a Davidi, muhoove omukuxa Maria mwaar'inyu, maana ole orupaliwe mwa yoowo t'a Eroho Yowarya." Oh, wulu! Ohakalalihiwa xeeni! Munnona?

¹⁹⁶ Nto, Maria, arowaka omuro. Harusi mwaamukhaani, oophiyaka miyaakha muloko ni mithanu na mosa, muloko ni mithanu na miraru, atheliwaka ni mulopwana mmosa

aatonko othela khalayi ni aarina aana axexe; mulopwana mulweene. Nto owo aari...Owo aanimphenta, ni—ni owo khaasuwela mwah'aya. Ni owo aanimphenta, ni khaasuwela mwah'aya. Nto awo yaaphwanyaneyasa va. Orwaaka, orowaka omuro, orika maasi vakhani, ni asomaka itthu sothene owo—owo aathokelel'awe sa, Soolempwa, voohihoverya, vano nto Waarya iwe khuphania ohoolo wawe. Okathi Waarya iwe ophanimaly'aya, vale naaphwanyaneya Nlaikha.

¹⁹⁷ Kinniikoha moota xeeni Maria oonaly'awe? Nyuwo mootoko wupuwelela yeeyo? Kinniikoha sinto owo aahituthuwa ntoko soonaly'aka nsana.

¹⁹⁸ “Mutteliwe, Maria!” *Mutteeliwe* enihimya “mweemele.” “Nwiriyane etthu enrow'aka wooleelani. Ooreeriwa ti nyuwo mwa athiyana, maana moophwanya mahala ni Muluku, ni munrowa omuyara Mwaana. Muhimusuwelaka mulopwana, masi munoorowa okhalana Mwaana. Ni munn'inyu Elisapeeti, uuluvanle-ene, nave, owo oorupala nave-tho, ni onrowa omuyara mwaana. Nto ithoonyeryo iya sinimwiiriwa.”

Owo khwira, “Enrowa wiiraneya sayi yeeyo, moosuwela, woonaka wira nkimmusuwela mulopwana?”

¹⁹⁹ Nlo khwira, “Eroho Yowarya enimookhuruwelani. Oowarya Owo onrowa oyariwa ni nyuwo onrowa wihaniwaka Mwaana a Muluku.”

²⁰⁰ Mwaahiye anamanyemula ehimyeke etthu antthun'aya ohimya. Owo aanisuwela. Owo aanisuwela wira yaamukhala, okhala wira Muluku aahimye siiso.

²⁰¹ Vano, owo khino oonale sayi, nihiku nle no ovahereriwa, ahiiso orwa wira alyihiwe masoma Mwaana, okathi waarw'awe eettaka ni Mwaan'ola mwaamukhaani mmoononi mwawe, *saale*. Nto athiyana othene ekhalaka ottaiwene, othene n'ikuwo s'ottotthiwa saana, wira yaavahererye an'aya ni elyihawe masoma, nto ntoko othene aya empurulaka mwaapwittipwitthi. Masi owo aarina masiya manli, okukutthiwa wa oreerihiwa wawe yoowo. Mwaana mwaamukhaani oputaputeliwe-ene ni ikuwo sa mwaana, saapakiwe ni ekheero yaakumihiwe muxikoni wa enyompe, ekheero, ekhuneelo y'ottuli w'enyompe. Eyo ti yaari eputaputelo paahi munikulani. Awo khiyaarinasa etthu ya Yoowo. Awo khayareere ohaawasa. Nto va aaphwanyaneya owo.

²⁰² Khivanihovereya wira, athiyana othene yaakhala ottaiwene wa harusi mwaamukhaani uwo. Yiira, “Nkoonani, owo orina mwaana ooraruwa.” Nkoonani moota Muluku onikhalih'awe itthu wooneya ntoko soolipihereya. Oh, wulu! Owo onoopurulela manri mmaithoni mwa Satana. “Onanara xeeni! Ottakatta xeeni! Oraruwa. Ti yeeyo owo ory'awe. Owo namararuwa.” Eyo khiyaakhottinhe otthimaka murima mwa Maria mwaamukhaani. Awo yaanikhala ottaiwene wa Yoowo.

203 Awo nlelo anniira etthu emosaru, animwiihana Owo vano, “Santu oophirikeya, wala namathipelela,” wala etthu.

Maria aanisuwela wira ole aari Mwaana Awani. Owo aahitthikela arowaka, vamosaru.

204 Masi, oh, khivaatthuneya awo oweha okathi, Simeyoni, okilanthé-ene ottuli musaala, owo aahilaiheriwa? Owo aaheetta, alaleeryaka. Owo iirale, “Apwiya aakikhumelela.” Ni khwira, “Nkinrowa okhwa . . .” Nto owo aarina miyaakha miloko mithanu na miraru n’itthu okathi uwo. “Nkinrowa okhwa kihinatthi woona woopola Waya.”

205 “Oh, Simeyoni, muhuuluvala, mwan’aka. Awinyu—awinyu . . . Mutokweene owo mwa enamuna emosa aamurimeela ankhili, moosuwela, owo ori vakhani . . . Mmuhiye paahi meekh’awe. Owo t’ohipaca. Khonrowa omunanariha mutthu.”

206 Masi Simeyoni aahikhalana Masu a Apwiya, khwira, “Miyo kihoona Eroho ya Muluku ekikhuruwelaka. Miyo kaaheemela khuweha Eyo. Eyo khukileela, ‘Simeyoni, nyuwo munnikhala mutthu naxariya. Ni khamunrowa . . . Kinrowa wookhalihani onamoona ota iwe.’” Uh-huh. Ti yeeyo tu.

“Munrowa wiirela-ni yeeyo, Pwiya?”

“Owo mwaha Aka.”

207 Muupuwelo aka t’ula, wira Owo okhalane moota wo waathonya Nihiku nenlo. “Nyuwo mwaahikhalana namoona. Xeeni ohimwiiwelela yoowo?”

208 Vale aahikhala mutokweene Ana oohoona, okilanthé-ene mpa m’olompa, avekelaka. Apwiya khimuupululela, “Simeyoni ori mw’ekeekhai.” Amen. Owo khaawerya ovirikaniha okokola w’othana ni epiphi, masi aaniwerya woona ottaiwenexa waavikana atthu anci-ene olelo arina maitho ooloka. Owo aahoona, mwa Eroho, wira orwa wa Mesiya waari vakhiviru, Eroho yeetteettaka mmurimani mw’awe.

209 Munnoona Ekereja yaamukhaanixa yaakhanle? Zakariya, Elisapeeti, Maria, Yohani, Ana, ni Simeyoni; athanu na mosa w’ale imilyawu sene. Ntoko mahiku a Nowe. Athanu na mosa aya. Muluku aaheettana ni khula mmosa a yaawo. Awo othene yaaris a owiiwanana. Awo othene yaahiiraana. Amen.

210 Va, Simeyoni mutokweene. Va aarwa Mwaana mwaamukhaani akelaka. Owo khatonko wiiwa hat’etthu ya yoowo. Va ori Mwaana. Nto Simeyoni okilanthé-ene okatthi wawe, vano Eroho khimurweela, khwira, “Mukhume, Simeyoni.”

211 Owo khurwa, eettaka, ahisuwelaka otthu waarow’awe. Ntoko Abrahamu, owo aaphavela etthu. Owo khaasuwelela nipuro naary’aya, masi aahitthikela eettaka. Nuvira okathi vakhani, owo aaheemela. Nto Eroho Yowarya siiso yaamuhimenrye wira, “Ole ori vale.”

212 Owo khookola matat'awe, mpakha mmoononi mwa Maria, khimukuxa Mwaana mmoononi mw'awe. Khuweha osulu khwira, "Pwiya, muhiyekeni murumeyi Anyu vano okhuma mw'ekumi ila ni murettele. Maitho aka anweha woopola Wanyu." Etthu ene yeeyo atthu othene yaaveehaaya, yeeyo athiyana yaathanyaaya, Simeyoni iirale, "Nno woopola Wanyu, Pwiya."

213 Nto okathi ene yoowo, va onoorwa muthiyana mmosa mutokweene ohinoona, arukureryaka vale, aapapelaka vamuthukumanoni. Nto owo khurwa mpakha wa Yoowo, nave-tho owo aahilaleerya, maana aaninwehererya Yoowo. Owo khimuhimeerya Maria, "Xoowa onoothikila murim'anyu, masi onimooniherya soowuupuwela sa mirima sinci-ene." Munnona? Yaari exeeni iyo?

214 Vano, kinoona wira, amosa-amosa w'axithiyana ale yiirale, "Vano nkoonani ile! Munnoona enamuna xeeni ya muxov'ole? Eyo vo. Munnona? Ti yeeyo. Munnoona vary'aya? Mutokweene ole, oovahuwa muru. Ole ori vale, eemenle ohoolo wa mwali ule namuttompe, eereryaka ohimya etthu ntoko eyo. Eyo vo. Mwaan'ole ooraruiwa. Nkanweheni mutokween'ole Ana, okilante vale, atthunaka wiisiiva mwaha w'etala, vano oniira saale. Owo khonrowa othweela ntoko siniir'ahu. Masi, eyo vo, moone. Owo aamuwerya wira mpantte wa makhuru othene nno a mulaponi. Owo onikhuma mw'emusini yooloka, moone, ni aamuwerya wira mpantte a weiwo. Masi ole ori vale. Munnoona moota nikhuru nle ninkhal'aya vamosa?" Oh, ayo. Amen.

215 Etthu emosaru olelo. "Ookilaathi mapuro a Wirimu mwa Kristu Yesu, oovenxiwa ni Eroho Yowarya." Vekeekhai. Ayo, mulopwana.

216 Oh, nookhalana-tho okathi vakhani paahi? Kihaana ohimya etthu. [Muthukumano oniira, "Ayo."—Mol.]

217 Kihaana mutthu mukina va, kinimuweh'aka, okathi yoole Masu yiir'aya yooniheriwaka, axilopwana asuweli.

218 Kaatthuna kirine-ene okathi, Fred, wira musome yeeyo. Muhaana mpoolosani mw'anyu? [Munna Fred Sothmann oniira, "Ayo."—Mol.] Kookupali wira anci-ene a nyuwo muhoona murevistani.

219 Etthu Eroho Yowarya yaalavunly'aya ohitto nno omuro, miyaakha miloko mirarau ni miraru sivinre, awo anoomalaru wuhula. Mahiku 9 a Dezembro, yooniheryaka, ya esomelo ittheneeri, moota ole—Yupitere ule ni ittheneeri iye, munikhuruni mwaya!

220 Awo yaahikhalanasa ekale- . . . ni ikweretho sa yeeyo, awo yuuhunly'aya. Ti okathi ene yoowo nikhuru nla na ittheneeri naakenly'aya, munikhuruni mwa ittheneeri iya, khweettiheriwa ovenya wene olukama oPapilooniya, nto asuweli khurwa ni yeeyo. Munnuupuwela? Awo yaahikumaniha iphiro saya,

khukuruxa ipilyawu sa miyaakha sa eyeettelo ya waarya emaara ekina. Vano asuweli ale aYuta yaarisa oPapilooniya, yaahoonasa ettheneeri ile okela munikhuruni mme, ittheneeri iye. Tthaaru sa seiyo khukela, khutakanxana, khupaka ettheneeri emosa y'oxaka. Ni yaanisuwelasa wira ni Masu a Muluku, wira ole waari p'ukathi, okathi ittheneeri iye saathukumann'aya, wira Mesiya aahaana okhala elapo ya vathi.

221 Tivo awo yaahimyas'aya, "Ori vayi Ole, oyariwe Mwene a aYuta? Ori vai Yoowo? Nipuro nlo! Tthiri, okathi ittheneeri iye sinkel'aya, mpakha irutthu saya s'osulu okhala erutthu ila yulupale y'osulu nno, okathi iye tthaaru sinthukuman'aya, Mesiya onokhala elapo ya vathi okathi uwo." Nto okathi sikenly'aya mphironi mwaya, alopwan'ale yaahisuwelasa wira Mesiya aari elapo ya vathi.

222 Awo yaari anamasuwela a muteko aya. Awo yaari atthu aalupale. Awo yaari anamasuwela a muteko aya wa siyensiya a etiini. Awo yaawehasa mpantte wa etiini wa yeeyo. Ni yaahoonasa wira ittheneeri iye saaheetta, Yupitere ni Sargasi, vano nto khukela mu—miliinyani mwaya. Nto awo khwira, "Hiyo nooswela wira Mesiya ori nipuro nlo. Tivo, Owo ohaana okhala oYerusalemu, okhala wira nlo ti nipuro nuulupale na etiini molumwenkuni, na etiini ya Mesiya. Nlo ti nipuro naya nuulupale. Nlo ti nipuro nuulupale na miromolelo. Ti weiwo nikhuru nuulupale n'anamukhutto ninthukuman'aya."

223 Vano khuwelasa ikhamelo khurwasa, miyaakha miili, elapuwaka Muro Tikri, eviraka mmattaponi ni itakhwa, yeettasaka mukwaha, erowasaka opooma, mirima sihakalalaka vanci-ene.

224 Awo yaahisuwelasa okathi ittheneeri iye siithomeiye aya vale. Nto ela, hata anamasoma ittheneeri aniira, olelo, "Vekeekhai, vakhala-ru wira ittheneeri iye, sinoothikela nipuro nenle, yaamupakeya ettheneeri emosa, okhuma vaavo awo yeemelans'aya, ewehasaka." Masi awo yaahaana weemelasa nipuro nenle, wira yoone. Amen. Amen.

225 Entthariha nipuro mweemenly'anyu. Entthariha ele nyuwo munweh'anyu. Uh-huh. Ayo.

226 Tivo awo yaahoonasa, ni yaahitthara, nto awo yaarisa muliinyani oratteene. Voohicala nipuro xeeni awo yaaphiyas'aya, eyo yaari muliinyani oratteene n'awo. Eyo yaanaahoola. Munnona?

227 Ti siiso murin'anyu okhaliha oratteene Soolempwa sothene soolikana, sothene, nto mukhale muliinyani memmo ni Soolempwa. Eyo t'inamuna emosa-ene. Iyo sinimoochoolani olukama wa Yoowo. Vekeekhai sinimwiira.

228 Vano nwehe. Awo jaarwaasa va, ekhuwelaka, "Ori vayi Ole, oyariwe Mwene a aYuta?" Khukela oYerusalemu, Ettheneeri yaahaahoola mpakha weiwo, orowa khulukama nipuro

nuulupale na miromolelo. Masi okathi awo arukunuwenly'aya epante ekina wa yeeyo, Ettheneeri yaahaahiya. Awo yaahikela mpooma, eviraka iphiro nno ni nno. Awo yuupuwela wira epooma yaarowa osareya ohakalala wa Muluku. Yaaneetta nno ni nno mphironi, ehakalalaka, yaanirowa, ekhuwelaka, "Ori vayi Ole oyariwe Mwene a aYuta? Nrimoona Ettheneeri Awe okathi waary'ahu Onikhuma nsuwa, nto nihoorwa wira nimukokhorele Yoowo."

²²⁹ Muupuwele, Ettheneeri, awo yaaronwe onkela nsuwa. Awo yaarisa Onikhuma nsuwa. "Onikela nsuwa erowaka, nlelo yeettaka. Munihoole wa . . ." Munnona? Awo vekeekhai yaari . . . Awo yaari . . . Ahe, Papilooniya ni Hintiya siri epante Onikhuma nsuwa w'oPalestina, okuusini vakhani. Nto awo yaarowasa onkela nsuwa. "Orowa onkela nsuwa," nyuwo munnisuwela nsipo, "nlelo yeettaka. Munihoole mpakha Waarya woomalela oreera." Munnona? Awo, asuweli, jaarwa mpakha onkela nsuwa. Ekhumaka Onkhuma nsuwa, erowaka onkela nsuwa, vano yaahoonasa Ettheneeri ile. Vano, vaakhanle wira jaarisa Onkela nsuwa, ewehaka ottuli, awo khayaarowa wooka Eyo. Munnona?

²³⁰ Awo, vaphiyaly'aya iwe, Eyo yaahiweettiherya olukama weiwe, vano khwaahiyaka. Vano awo khuupuwela, "Ela va. Ettheneeri yoorowa, tivo ela va." Awo arisa mpooma. Tivo, "Oh, wulu," awo khwira, "atthu othene animwiipa paahi n'utthapa. Ovuwa wa Muluku woomwaleela itthu sothene. Vano, noophiya. Noosuwela wira yawihu—noosuwela wira yoophwanya ahu, vawehaly'ahu nikhuru nle na ittheneeri, khaavo, hata muxuttiha, aawerya owela vale othukumanya ittheneeri iye vamosa. Ni noosuwela, okathi iye—okathi ittheneeri iye sinkel'aya erutthu ile ya wirimu, owo p'ukathi Mesiya ory'awe elapo ya vathi. Mesiya ori elapo ya vathi."

²³¹ Nto khula miyaakha emiya sinci-ene, iyo sintthikela okumana munikhuruni mwaya, moone, vano nto yookhala yoovaha enrwa elapo ya vathi. Nwehe.

²³² "Mesiya ori elapo ya vathi, okathi nle—okathi nikhuru nle na ittheneeri ninkhal'aya vamosa." Ni awo yaahisuwela wira Owo aari weiwe, tivo jaarowans'aya nipuro nuulupale na etiini, nto khupaceryasa orowa, yiiraka, erowaka nno ni nno mphironi, ikhamelo iya, "Ori vayi Yoowo? Ori vayi Yoowo? Ori vayi Ole oyariwe Mwene a aYuta? Hiyo nrimoona Ettheneeri Awe Onkhuma nsuwa. Owo ori wenna nipuro nlo. Ori vayi Yoowo? Ori vayi Yoowo? Ori vayi Yoowo?" Huh! Oveehiwa xeeni!

²³³ Awo yaahirowasa wa mukhulupale a anamukuttho. Owo khwira, khino iirale, "Exeeni eniwiirani nyuwo alopwana? Vano, nyuwo nikhuru n'anamathipelela!" Munnona? Oveehiwa xeeni, ettharihaka soopaka saya sa siyensiya! Ni owerya wa Muluku, awo yaahoonasa Ettheneeri Awe. Ni awo yaari asuweli, aankhili. Awo jaarisa vapuwani va siyensiya a etiini. Ni yaanisuwelasa

wira, ittheneeri iye vaphiyaly'aya iwe, Mesiya aari nipuro nlo. Nto va, nipuro naarina wira nisunwele-ene, khinaasuwela hat'etthu ya Yeeyo.

²³⁴ Kinnitthokelela, wira anamwane yeemenle-ene mphironi, yaira, "Ha! Nkawehani ile. Ha! Nle nikhuru n'anamathipelela. Nkawiiwaseni, yiiraka, 'Ori vayi Ole, oyariwe Mwene a aYuta?' Awo khansuwela wira Heroti ti mwene nno. Awo khammusuwela Pixipu *Lexe*." Oh, wulu!

²³⁵ "Ori vayi Ole oyariwe Mwene a aYuta? Hiyo nrimoona Ettheneeri Awe Onkhuma nsuwa."

²³⁶ Awo khwira, "Murwe nno, nyuwo asuweli othene, mwaattamele nno." Uh-huh. "Murwe nno. Nyuwo othene munnoona Ettheneeri nipuro nlo?"

"Oh, nkinatoko woona etthu ntoko Eyo."

²³⁷ "Nyuwo anamasoma ittheneeri othene murwe va. Nyuwo othene muhoona Ettheneeri nipuro pi nipuro?"

"Nnari. Nnari."

"Muhoona etthu p'itthu ntoko enamuna emosa y'ekanyeryo ya mwiirirya?"

"Nnari. Hiyo khannoona hat'etthu ntoko eyo. Nnari."

²³⁸ Nnari, khayonne nave. Etthu emosaru. Awo khaanoona hat'etthu. Awo khanwerya woona Eyo.

"Uh, nrowe niwiihane a—arumeyi. Ankhi nyuwo othene?"

"Nnari. Khannooneke hata Ettheneeri."

²³⁹ "Ahe, ankhi nyuwo aximiravo munaalikela okathi, vate va vaxirini? Nyuwo munweha ittheneeri. Moosuwela otoko... Munsuwela khula nikhuru na ittheneeri nikhanelle wirimu. Munsuwela khula ettheneeri. Muhoona etthu?"

"Nnari. Khanonne etthu." Masi Eyo yaari weiwe.

²⁴⁰ Avuwihawe Muluku! Oh, wulu! Khamunwerya wonna Eyo? Eri weiwe naanaano va, nave awo khanwerya woona Eyo. Eyo enimwiiraneya, ohoolo waya, nave awo khanwerya woona Eyo.

²⁴¹ "Nnari. Hiyo khanonne hat'etthu. Oh, miyo kaahirowa iwe. Nkonne hat'etthu." Vekeekhai, khamunoona. Ohoona tu. Kheri wira nyuwo moone. Munnona? Mwaary'ene ohoona siiso, vano, vekeekhai, khamunrowa woona.

²⁴² Eyo ti y'ale Muluku onrow'awe owuupululela paahi. Awo t'ale anoona Eyo. Kweekwe enkhala siiso. Vekeekhai.

²⁴³ Aari Nowe aawerya woona epula osulu, moosuwela, masi akina aya khayaawerya. Munnona? Awo khayoono epula osulu iwe, masi Nowe aahoona.

²⁴⁴ Aari Abrahamu aamonne Saara anvarelaka mwaana. Ti yeeyo. Kahi anamanyemula yiirale, "Tiithi a maloko, aana akavi murin'anyu vano?"

245 Moota waakhanly'ahu oviraka mBibiliani mothene, asuweli ni maprofeta, okhuma wopaceryani mpakha wookiseryani! "Waamini t'ikeekhayi ya itthu sihinooneya." Awo annisuwela wira Masu aahimya, nto ele vale. *Va t'eri ekeekhayi aya. Awo annoona. Vano nwehe. Oh, wulu!*

"Asuweli ahu khaanoona Ettheneeri iyo. Khiivo hat'etthu mwa Yeeyo."

246 Mwaha wa xeeni? Vekeekhai, okathi yaaphavel'aya, vano khwiikelihani nikhuru ntoko nle, Ettheneeri yaahittipha.

247 Etthu emosaru olelo. Ti yeeyo enaattipiherya Waarya anciene, ti yeeyo, onkhala wiitakanxa nnikhuru ntoko nlo, hata nihinaamini Yeeyo, opacerya wene. Ni ninrowa okhalana sayi wi—wiiraana wa ikereja? "Ninrowa weetta sayi vamosa nihiiwananaka?" Ori sayi opatthana wa e...wa ela va, olumwenku wothene, sothene—ikereja sothene, ikereja so wiiwanana sa molumwenkuni? Ninrowa wiiraana sayi vamosa, niry'ene imiilya imilyawu sene voovirikana? Munnona? Ninrowa wira sayi? Ale a Onamalaleya ni hiyo, n'ula, n'ule, n'ule, ni othene vamosa, nave nlelo niiraanaka nnikhuru na soopahuwa ntoko nlo.

248 Muluku ommukuxa Mwaara okhanle ooloka, oowaarya, oohihoneya, onkhala ni Masu Awe. Vaareera.

249 Oveehiwa wa Yesu mwaha wa Masu. (Vano nto ninoomaliha, muhina mwa minuutu mmosa.) Yesu aahiveehiwa mwaha wa Masu. Nkawehani va. Owo eemerentye sayi oveehiwa, Owo ory'ene Muluku, owiipaka erutthu w'eMuluku? Owo aari Muluku, Mwaneene, owiipaka erutthu.

250 Vano, moosuwela wira Bibilia ohimye siiso. "Hiyo noomukwannya Owo. Malaikha aamoona Owo." Muupuwele yeeyo paahi. Kookupali wira Timoteyo onnihimya etthu siiso. Munnona? Wira, "Vekeekhai esiiri ya nttittimiho nuulupale t'ila; wira Muluku ohiisooniherya mw'erutthuni, ohooniwa ni Malaikha."

251 Malaikha waari w'oyariwani Wawe. Moota Malaikha yaarin'aya oweha vathi khuhakalala, okathi yaawehaly'aya vathi munikulani khumoono Muluku iipanke-ene erutthu. Amen. Khivanxankiha wira awo yaahipacerya okhuwela, "Olelo, muttethe wa Davidi, ooyariwa Kristu Moopoli." Malaikha yaahihakalala, ni yaahikumaniha mapupha aya maalupale, nto vasulu va myaako s'oYuteya, yaahiipa, "Avuwihwe Muluku wirimu-rimu, murettele okhale vathi, ni atthu onaaphent'awe." Awo yaahoono Masu a Muluku, yaahikhapelela Yaawo, wira yooniheriwe. Nto yaari vale.

252 Vano, Satana khaamini iyo, moosuwela. Owo iirale, "Nyuwo mwaari. . ."

Nlaikha niirale, "Ti Yoowo." Eyo t'evirikanelo.

“Nyuwo mwaari yoowo, mwiire *elexe n’ilexe*. Nintthuna niwooneni Nyuwo mwiiraka.”

Masi Nlaikha niirale, “Owo ori vale.”

253 Asuweli ni siyensiya aya a etiini, yiirale, “Owo ori vale.” Amen.

254 Tivo anamasoma a ilimalelo sa khalayi ni sothene olelo anuuhul’aya itthu iya, saalaleeriwe miyaakha vakhani sivinre, wira saamurowa omaliheriwa. Nto iya siri va, suuhuliwaka. Awo khanatoko hata . . .

255 Khiivo hata ehantisi etonko ohimya wira Ponsio Pilato ootoko okhala mulaponi. Mwaanisuwela yeeyo? Amosa-amosa a nyuwo anaxikola mukileele nipuro xeeni mwa wahala ohimye wira aahikhala Ponsio Pilato. Vano alipa-oohaamini annimye ni oveeha, aniira, “Khonatoko okhala mu—mukhulupale muRooma iihaniwa, ku—kuvernatooro iihaniwa, Ponsio Pilato.” Masi isumana soophiyaka thanu na mosa sivinre, awo yaahuuhula nluku na vanlothoni: Ponsio Pilato, kuvernatooro. Oh, wulu! Ethiru xeeni!

256 Awo khwira, “Khonatoko okhala hata Ramese mwa wahala, Ramese aaruma wEjitu.” Masi awo ahuuhula nluku, anamasoma ilimalelo: Ramese, anenli. Nwehe.

257 Ni ahimye wira makokoro ale khanatoko omora. Anamasoma ilimalelo yaamuthipa vakhiviru, nto, naanaanoru, awo khuuhula, vathi vaavo makokoro yaaphomonw’aya oYeriko, moosuwela, okathi nirummy’aya nlope. Awo khwira, “Ele yaari ethale paahi, nsipo nimosa mutthu mmosa ohimaly’awe, iipaly’awe wu.” Ayo. Anamanyemula anihimya yeeyo. “Eyo yaari ethale paahi. Khenakhaleke etthu ene eyo ntoko makokoro omora, ni Yoxuwa oopaka nlope, n’utthimaka mpakha vamakokoroni vano awo khuphomowa. Khenekhaleke etthu ene eyo.” Nto namasoma ilimalelo mmosa muKristu muulupale aarootthikela ahipaka paahi, okhala wira aanisuwela wira yaahaana okhala siiso. Owo orootthipa imeeturu thanu na xexe n’itthu, vathi vaavo vaari sikina saya. Yaahikhala makokoro, yaapitheeryanne nimosa vasulu va nikhw’aya, siiso ntoko Masu sihimaly’aya.

258 Awo yiirale, “Khiyaakhanle etthu ene eyo ntoko Davidi orumiha ekaruma awe, tthakare a mikhoyi, okhala wira masipo khiyaasuweliwa mpakha eseekulu muloko ni thanu.” Khwira, “Khenakhaleke etthu iyo.” Anamasoma ilimalelo aKristu khuthipa, wEjitu. Miyaakha ikonto xexe khalayi, awo yaanikhalanasa ikaruma sa masipo. Amen. Oh, wulu!

259 Awo khwira, sa aana aHeperi yaapaka maluku ale ni itthu siiso, sa malaxi, “Khiyaakhanle etthu ene eyo.” Anamasoma ilimalelo khupacerya othipa iwe. Awo yaaphwannye exeenii? Owo siyensiya. Awo yaaphwannye exeenii? Makokoro a muttethe aHeperi yaatenk’aya, epara yoopacerya ya maluku

yaari malaxi oorakama; yanenli ikapatti sikhaani saathikilasiwe sa ikayaway; nto yaneeraru khiyaarina hata malaxi mwa yeeyo, hata vakhani. Oh, wulu!

Maloko anookawanyeya, Isarayeli onooventya,
Ithoonyeryo maprofeta yaahimaly'aya khalayi
ene;

²⁶⁰ Ayo, mulopwana. Yothene eyo yooniphiyerya hiyo, munna mulopwana, muthiyana. Ekhalenle-ni yeeyo? Mwa miyaakha vakhani sookiserya, olumwenku wa isineema khonaireke etthu wiiraly'aya. Muteelani enikhumela ehantisi emosa ya *Sooruma Muloko* ya Cecil DeMille. Muteelani enikhumela ekumi ya Yesu Kristu ni *Ben Hur*. Muteelani onikhumela *Mutothi a ihopa Muulupale*, orukunxa murima wa Petru. Ni othweela nno wothene wa etiini, isineema sikhoottaly'aya, onanariha, orihela ottaiwene. Masi, Muluku, n'uwerya Wawe wuulupale, oosuweliha iyo, vamosaru.

²⁶¹ Naanaano va, itthu iye saahimmwe miyaakha vakhani sivinre, murumeyi mmosa, oohaawa, mukhaani a Muluku, ntoko miyo, miyo khwira, "Wookhala Waarya waari vale waalavunle ni miyo, khukileela itthu so wira." Atthu khutheya khwira, "Owo oovahuwa muru vakhani." Yookhala elatarato ya Yeeyo. Siyensiya ookumiherya Yeeyo. Ori vale. Eyo Ekeekhaii.

Miyo khwira, "Muthiyana ookhalana eruku ya okhwa."

²⁶² Awo khwira, "Ntoko eruku, vano, eyo ethiru. Owo onoopaka paahi mmuruni mwawe."

²⁶³ Ele eri vale elatarato aya. Muluku onimwiiriha maluku okhuwela. Owo onniwerya wira etthu Owo onthhun'awe.

²⁶⁴ Yesu, oveehiwa mwaha wa Masu. Mwaana a Muluku a eMuluku eemenle-ene vale, Emanuweli, oveehiwa xeeni! Aahimuhya natampi oohaamini omutthukwa, osenyela wiitho Wawe, ni omurocola ireru sawe nikuphi nimoso, eererye Owo wira etthu mwaha wa yeeyo. Oveehiwa mwaha wa Masu! Uh-huh. Exeeni? Wira omaliherye Masu a Atithi. Oh! Masi, muupuwele, Owo aahaana ovilela oveehiwa w'okhwa. Muluku, Yoowo ohinikhwa, ni Mmose-ene aakhanle okhwaaka wira amoopole natampi. Oohikhala-tho mukina, kahi mutthu a nenli wala mutthu a neeraru, aawerya wira eyo. Muluku Mwaneene ti Mmosa paahi onwerya wira. Nto Owo aaphwanyaneya va.

²⁶⁵ Owo khwira, "Khaavo owenle wirimu ohikhanle Yoole okhurunwe weiwo, Ori Mwaana a mutthu yoowo ori Wirimu vano." Amen.

²⁶⁶ Awo khwira, "Axitiith'ihu yaahilya emana mothakoni."

"Nto awo ahookhwa," Owo kuhimya.

"Nto Nyuwo muniira wira mwa Yolya y'Ekumi?"

267 Owo khwira, “Abrahamu ohinatthi okhala, MIYO KOOKHALA. Miyo ka Yolya y’Ekumi. Miyo t’ule KINKHALA.”

268 Awo khwira, “Nyuwo khamurina miyaakha miloko mithanu, vano muniira wira ‘moomoona Abrahamu’?”

269 Owo khwira, “Abrahamu ohinatthi okhala, MIYO KOOKHALA.” Vano nto anatampi khumutthuka, ekereja ya muromolelo, khumutthuka.

270 Muupuwele, nihiku nookiserya, ekerej’ela yoothaaciri ya Lawotiseya, awo amuhenle ota, hata, wa ekereja. Munnoona vatthu vary’aya vano? Munniwerya woona xeeni miyo okhuwelelaka eyeettihelo ene?

271 Xeeni Yesu waahiya anatampi omutthuka? Yaari wira emaliherye Masu, oruuha oveehiwa Muluku, akhwaaka. Muluku aahaana okhwa. Owo aahaana okhala erutthu, wira akhwe. Ni Yesu aanisuwela eyo. Owo aahaahimeerya eyo. Owo iirale, “Mpwxakase emp’ela, nto Miyo kinooteka-tho.” Kahi mutthu mukina aarowa oteka. “Miyo kinooteka. Eriyari ya mahiku mararu, Miyo kinooteka-tho. Nyuwo mpwexakase; Miyo kinooteka. Ntoko Yona saakhanly’awe mmirimani mwa nankumi, mahiku mararu othana ni ohiyu, siiso-tho ohaana okhala Mwaana a mutthu eriyari y’etthaya.” Vano awo hata khayaasuwela saana. Munnona? Oveehiwa mwaha wa Masu, Owo—Owo aahikhala.

272 Vano, onyemuliwa mpakha mookhwaani, wira ahihimuwe-tho wa Ekumi Ehinimala. Yoopacerya Owo aahaana okelihiwa mookhwaani, wira awerye ohihimuwela Ekumi Ehinimala, ni omuruuha khula mutthu (aari mwa mukhalelo Awe) wa Ekumi Ehinimala, aarowa okupali Yeeyo. Munnona? Owo aahikhala mutthu, aahikhala mmusi Nvuluxa, ni aahaana ovilela oveehiwa wo onyemula wothene, ni otheiwa wothene, siiso ntoko arumeyi Awe yaavilenly’aya Owo ohinatthi. Ntoko Moise, ntoko Nowe, ntoko othene aya akina yaavilenly’aya onyemuliwa iwo, Owo aahaana ovilela onyemuliwa. Mwaha wa xeeni? Owo aarina Masu, ni Owo aari Masu. Mwaha wa yeeyo awo yaamunyemul’aya ovikana khula okathi. Owo aari a eMuluku ni Masu Ene. Aleluya! Ti yeeyo yaamukhaliha Owo.

273 Yesu khwira, “Nyuwo anawoothe.” Khwira, “Nyuwo munteka ikhapuri sa maprofeta, nave ti yeenyu mwaahenle-mo. Awo jaarwanse ni Masu a Muluku, nto nyuwo khamuwaaminni. Nyuwo moottheke mwaha wa khula mmosa a yaawo.”

274 oPhoenix, Muluku atthuna vale, kaahiphwanya nuulumo nimoso nihiku nlo, kinrowa olokoha nloko nla mwaha wo omwiivaka Yesu Kristu, omukhomelaka tho Yoowo, kinrowa oruuha olokoha ohoolo wa oxirikh’owo wa arumeyi, Muluku atthuna vale. Awo aakhalana mulattu wa Ephome ya Yesu Kristu, mwaha wo omukhomela-tho Yoowo. Ayo, mulopwana. Waalokoha othene!

275 Petru aahaalokoha, Nihiku na Pentekosite. Owo iirale, “Nyuwo ni matata ootakhala moomukhomela Mwene a Ekumi, Yoowo Muluku omuhihimuxaly’awe. Hiyo n’anamoona.” Owo aahiruuha olokoha.

276 Kinrowa okuxa Masu a Muluku, kilokohe khula muromolelo okhanle, ni khula mutthu elapo ya vathi, ori oottheke mwaha wa Ephome ya Yesu Kristu. Muluku akikhaliherye wira kikhale mulapeli Awe nihiku nenlo. Amen. Ayo.

277 Oh, anamanyemula yaanimutheya Owo. Awo yaahinveeha. Owo aahikhala ooromeleya ni Yeeyo. Amen. Oh! Nwehe ethu Owo iiraly’awe. Owo aari Mwaana a Muluku, aahivira mookhwaani wira ahele etampi mookhwaani. Owo aahaana wira eyo. E . . . Eyo t’inamuna emosa paahi yaakhanly’aya oheliwaka mookhwaani. Nto Owo aahiira ela, ni aahivilela, okhala wira othene akina yaahiira.

278 Okhala wira, othene ale ottuli wu yaahikhalana Masu a Muluku mwa okhaani. Okhala wira, Yesu ohimnye siiso. “Ma—Masu a Apwiya jaarweela maprofeta. Nto t’ani a yaawo,” Owo iirale, “wira axitiit’inyu, etiini anyu yoothokihwiwa, yahanvonyakanse aya ni omwiiva? T’ani a yaawo yawaakhenle maprofeta? Vano nyuwo munteka ikhapuri saya vamanly’aya orowasa.” Khwira, “Nyuwo moottheke mwaha wo waahela mme.”

279 Vano Owo aahaavaha nlikanyiho na ematta ya iviteera yo woolihiwa, ni arumeyi jaarwiye. Awo yaahaahooxa, nto vookiserya khwira, “Vano ninrowa omwiiva mwaana, okhala wira owo ti murithi.” Munnona? Oh, awo yaahinanariwa voonaly’aya yeeyo. Munnona?

280 Masi Owo aahaana ovilela oveehiwa. Nto va Owo aahiihthukiha, khukuxiwa mpakha mookhwaani, wira aiviwe, wira ahokoloxe Ekumi Ehinimala. Avuwihwiwe Muluku! Oh, moota onimphent’aka! Ohokoloxa Ekumi Ehinimala ni omuhihimuxa khula mwaana a Muluku, moovirani wa okathi wothene, aavilenle ni Masu ale n’uphwanya oveehiwa. Ti yeeyo.

281 Owo ahaarwiye, Nowe khaawerya ovenya. Owo ahaarwiye, Eliya khaarowa ohokolowa. Owo ahaarwiye, Nowe khaakhalakhala avenyaka, Owo ahaawenrye. . . Owo ahaarwiye. Okhala wira, Owo aari Mwaapwittipwitthi ule oothommwa, aarwiye ophwanya oveehiwa iwo wa yoowo Mwaneene, ni ophwanya okhwa iwo mwaha wa Masu a Muluku othene yaalavuliwe, n’axilopwana ala anaxariya yeemereny’aya. Owo aahaana okhala. Khaavo-tho mukina aawerya wira. Muluku Mwaneene, ni Owo aahirwa khukuxa opuro ene, wira awerye onvuluxa n’unvaha Ekumi Ehinimala khula mwaana a Muluku eemereny Masu yaawo ni aarowa ophwanya oveehiwa. Khula mwaana a Muluku, moovirani wa okathi wothene, aarowa ovilela oveehiwa, khaavo hata mutthu

aawerya onvuluxa, masi mwaha wo waamini owo aahimoona Nvuluxa owo aarowa orwa.

²⁸² Yobi aahimoona Owo. Yobi ary'ene iwe, nto awo khwira, "Oh, nyuwo mwa natampi a wiphiini. Muluku onimoohukhumuni, okhala wira mwa natampi a wiphiini."

²⁸³ Owo khwira, "Koo suwela wira Moopoli aka ookhala. Mahiku ookiserya Owo onimoorwa elapo ya vathi. Hata axiitthu anahononaka-ru erutthu ila, nlelo, ni erutthu aka kinoomoona Muluku."

²⁸⁴ Amwaar'awe khwira, "Xeeni muhininveehaanyu Yoowo mukhwa?" Khwira, "Munkhala ntoko ootakhaliwa namuhaawi."

²⁸⁵ Owo khwira, "Nyuwo munlavula ntoko muthiyana oovahuwa." Amen. Owo aari vale. "Koo suwela wira Owo ookhala, ni onoovenya Nihiku nookiserya."

²⁸⁶ Yesu ahaarwiye, Yobi khaawerya wira ovuluxiwe-ene, okhala wira Owo aari Mwapwittipwitthi iiviwe okhuma opattuxiwaka-ru olumwenku. Owo aanisuwela opuro Awe. Owo aanisuwela mukhalelo Awe.

²⁸⁷ Mwaha wa yeeyo, Maria aasuwenly'awe mukhalel'owo, nihiku nle okathi okhumaly'awe. Owo iirale. . . "Miyo. . . Nyuwo mwaari vaava, murokor'aka khaakhwa."

Owo khwira, "Murokor'inyu onoohihimuwa."

Khwira, "Ayo, Pwiya, wohihimuwani. Owo aari mmiravo ooreera murima."

Yesu khwira, "Masi MIYO KI ohihimuwa weiwo. Nyuwo munnaamini etthu ila?"

²⁸⁸ Owo khwira, "Ayo, Pwiya, kinnaamini wira Nyuwo mwa Mwaana a Muluku aatthuna orwa molumwenkuni."

Owo khwira, "Munvithale vayi?" Oh! Eyo vo. Um-hum.

²⁸⁹ Owo aahisuwela eyo. Mwaamuthiyan'ole khaahimya eyo. Owo aahikhalana axetwani athanu n'aali yaakumihiwe mwa yoowo. Owo aanisuwela owerya wa Muluku, waawerya okumiha wiisoona, wuukhuleya ni itthu sothene, mwa yoowo, waawerya okumiha erooho ele, yo wiisoona y'oxikola mwa yoowo, ni waawerya omukhaliha oopattuxiwa musya. Owo aahiwoomola axetwani athanu n'aali. Athiyan'ale yaanisuwela wira Owo aari pani, yaale yaamukupanli.

²⁹⁰ Yaanisuwela exeeni Owo aakhanly'awe owiirelaka. Siiso-tho olelo, nave. Mukupali paahi. Eyo t'itthu enttharelana.

²⁹¹ Owo vo. Owo aahihimya eyo. Ni Owo. . . Moosuwela yaakhumelenle. Oh!

²⁹² Othene ale yaarowa ohaawela Masu ene yaawo, Owo okhwenle niwoko nenlo. Owo aari Mmose-ene aawerya okhwa, wira aire, maana Owo aari Masu. Owo aari Masu,

Masu owooniheriwa. Othene ale akina yaahikhalana ipwino sikhhaani, masi va waari omalela wa Muluku, mwa Yoowo. Owo ori siiso olelo. aHeperi 13:8, “Yesu Kristu mmosaru nsana, olelo, ni mahiku othene.” Nwiryane.

²⁹³ Kinoomaliha, vekeekhai. Kinrowa wira, kihaana wira. Nkireere ovikaniha okathi.

²⁹⁴ Owo khonalepeke hata nuulumo. Aahinto? [Muthukumano oniira, “Nnari.”—Mol.] Khonalepeke nuulumo nimosa. Mwaha wa xeeni? Owo aari Masu. Owo aari exeeni? Masu yaalempwe, Owo aari wooniheriwa wa Masu yaawo. Ovuwa! Whish! Vano kinnoona oreera. Owo aari Masu. Owo khaarina olepa hat’etthu. Owo aari Masu, Masu ala oolempwa owooniheriwa. Avuwihwe Muluku! Owo mmosaru olelo, nsana, olelo ni mahiku othene. Owo ti Masu, Masu owooniheriwa.

Nyuwo muniira, “Eyo ekeekhai, Munna Branham?”

²⁹⁵ Nkanweheni Yehova weemela iwe wiiseela mukoti mmawimpini mme iwe, khupaka ephiro wira Isarayeli avire eettaka.

²⁹⁶ Munwehe Yehova mw’erutthuni, wira, “Mmaale, mwiikhalele.” Okathi mawimpi yaaman’aya muxerexere, ni mwanankhaya, nto xetwani amanaka itthu sothene, siiso, Owo khwira, “Mmaale, mwiikhalele.” Vano eyo yaahimwiiwelela Owo; ittheke ni sothene. Owo aari Yehova. Amen.

²⁹⁷ Yehova yoole aawerya weemela iwe n’umiserya okame vakhani, ohiya omorela vathi n’ukhala ephawu, wira aalyihe atthu.

²⁹⁸ Owo aahivenya khukuxa ihopa thanu, ahiiso, mikatthe mithanu ni ihopa piili, khwaalyiha atthu ikonto thanu.

²⁹⁹ Owo aari Masu. Amen. Amen. Owo ti Masu, ni Owo okathi wothene onookhala Masu. Nto wa miyo ni etthoko aka, ninoorumeela Masu.

Oh, kintthuna kimoone Yoowo, kintthuna
kiwehe wiitho Wawe,
Weiwe wiipa mwaha wa mahala Awe
oowoopola;
Mphironi mwa Ovuwa, mukihye kivenyihe nsu
naka;
Sivinre-ene ixankelo sothene, owaani
vookiserya, ohakalala woohimala.

³⁰⁰ Oh, wulu! Ayo. Nvilele oveehiwa wa Masu. Wookhala oveehiwa onrowa ni Masu. Mukhale saana ni Masu, ni nvilele oveehiwa.

Nivekele.

³⁰¹ Yesu, ntoko ohiyu mukina, Pwiya, miyo kaahikhuwela, “O Yesu, xeeni Nyuwo muntthun’anyu wira kiire? Kiireke exeeni,

Pwiya? Noonaka itthu iya, ni nisuwelaka okathi onkhal'ahu, kiireke exeeni, Pwiya? Kiireke exeeni?"

³⁰² Kinvekelela ekerej'aka yaamukhaani va, Pwiya. Kinniwuupuwela axipalame akhaani mwa yoowoona, itthu sinkhalaka; ni axipalame akina, yaari itthu suulupale. Masi inamuna tthaaru a yaawo, Pwiya. Masi okathi arwans'aya Malaikha ale, khiyaahanle axipalame. Anamitthaka axikhaani annikhalasaka ooreerexa, Pwiya, masi kookupali wira yookhala etthu ehanle okhumelela. Mutthuniherye ekhale, Pwiya. Munuupe ni munipake ntoko enamuna Anyu. Hiyo n'o—hiyo n'oloko. Nyuwo mwa Mulipa-oowuupa.

³⁰³ Mwa okhuveela nno wa Natale, Pwiya, hiyo ninnixukhuru mwaha wa yoovaha ya Muluku, mwaha wa Muluku onivaha hiyo. Enamwi ela ekhalaka emosa, ntoko sinaamini ahu mmurimani mwahu, ethiru emosa y'epakawu ya nihiku atthu yeerenry'aya opaka ni okhala ntoko e—emiisa, emiisa wa Kristu, masi hiyo khaninrwa mwa enamuna yeeyo ya Paapa Noweli ni miri sa Natale ni—ni iphapo. Masi hiyo ninrwa mwa Nsina na Pwiya Yesu, wira nimukokhorele Muluku a Wirimu, aipanke erutthu, erutthu ntoko hiyo, khukhala ni hiyo, wira anivuluxe; nto khuphwanya oveehiwa wa Nsina, khuphwanya oveehiwa wa mwiikimanyo, wira otthuniherye mwaalaano wa molumwenkuni omukeliha Emanuweli mookhwaani, wira Owo anikelihe mw'Ekumini Ehinimala.

³⁰⁴ Hiyo n'ani, Pwiya? Hiyo n'ani, wira nitthyawe oveehiwa? Muluku, munikhalihe masurtatu ookhomaala. Kinnivahererya moolumo ala wa Nyuwo, Tithi. Siiso akhanle-ene oothikileleya; mwaha wo okhulumuwa ni woocaya ntoko siry'aka. Masi, Tithi, mwaatthuvele atthu ala mwaha wo okilaathi ni owiriyana. Ni wira oweraya onvenxale Pwiya'ahu, ni omooniherya Yoowo wa hiyo va ntoko Moopoli, mahiku ala ookiserya, ovahe ekumi khula erooho eri mu, Pwiya, wa okhuveela wo Orwa wa Pwiya Yesu. Ekhale siiso, Tithi.

³⁰⁵ Mwaavonihe aretta n'ale ooxanka ari eriyari ahu. Mwaalipihe ale ooriipiwa murima. Pwiya, hiyo n'a... Khanireere ovira vanci-ene, murim'aka khoreerane mirahu, Pwiya, sa ikhotto soolipa. Miyo ka mutokweene a khalayi. Mukikhaliherye, Pwiya. Kinniphavela mukhaliheryo Anyu. Khino exuttiheryo ela yothene yookhalana niwoko. Kinroromela wira t'ekhanly'aya, Pwiya. Mukikhaliherye, O Muluku. Ni mukhaliherye ekerej'ela. Ni munireerihe, vamosa.

³⁰⁶ Mwaareerihe axinamwane ala. Kinniwuupuwela anci-ene olelo, axikhaani, axikhaani oohaawasa ahinrowa waakhela etthu ota iwo. Nto ki—kinvekela wira Nyuwo mukhale ni yaawo. Mwaavahe Ekumi Ehinimala, Pwiya. Eyo ti yuulupale... eyo ti Yoovaha ya Natale nintthun'ahu, ti Ekumi ya Yesu

Kristu wira yeettiherye ni erume mmurimani mwaka. Ti yeeyo kintthun'aka, Pwiya.

³⁰⁷ Munireerihe, vamosa vano. Hiyo ninnivahererya Moolumo ala wa Nyuwo. Mutthuniherye emorele nipuro pi nipuro, Pwiya. Nipuro pi nipuro vari murima wootthukuwa, wira eruuhe okathi muulupale wo woopowa, mwa Nsina na Yesu. Amen.

³⁰⁸ Khula ole...Akavi animphenta Yoowo? Xeeni waakuvaxaka, khula enamuna? Oh, miyo kinnimphenta Owo! Miyo kinimphenta Owo. "Pwiya, xeeni Nyuwo murin'anyu wira kiire?"

³⁰⁹ Muhiliyale okokhorela w'olelo ohiyu. Munnisuwela enihimya Natale vano? Oh, *Ela* ti yoovah'aka ya Natale. *Ela* ti Masu awo. Pwiya, kawerya-ru paahi wiikhaliha, kawerya-ru paahi okhuma mphironi wira Masu Anyu ehimye Yeeyo, Mmansaya *vaava*, eyo ti—eyo t'itthu yuulupalexu ensuwel'aka.

³¹⁰ Vano kinoona wira sookhala itthu kamosa-kamosa antthuna ovahiwa anamwane. Vano kinonvahererya muteko Munna Neville. Muluku ooreeriheni.

Munna Neville.



OVEEHIWA MWAHA WA MASU EMK62-1223

(The Reproach For The Cause Of The Word)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeetaka 23 mweeri wa Dezembro, 1962, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org